





頤芳集卷之二十一目錄

才媛詩

古歛訥莽汪啟淑選

莊賁蓀 五首

陳 珮 十首

錢令暉 二首

錢令嫺 二首

劉 氏 句

王汝琛 三首

顧 瑩 五首

魯湘芝 三首

邵 笠 四首

林文貞 六首

張 蘭 一首

蔣永端 五首

陸 媵 一首

湯素畹 一首

張 氏 一首

沈蕙玉 一首

李 氏 一首

陸瑞玉 三首

季 嫺 七首

吳綠蘭 三首

任 婉 六首

沈清文 二首

孫玉貞 句





擷芳集卷之二十一

古歙詡菴汪啟淑選

莊賁蓀

字宜三江蘇陽湖縣人宮詹莊澹庵之女也適  
孫師儉著有悟香閣草

放園

曠野行人少亂山青未了閒雲度遠汀斜日帶飛鳥苔  
徑落花深柴門流水繞此中無世情把卷忘昏曉

孤山梅家大人歸自武林移植

攜自孤山處士家愛他瘦影橫窗紗昨夜風吹滿林雪



一枝兩枝冷着花玉蕊瓊葩何皎潔疑是枝頭翻蛺蝶  
暗香春曉入簾櫳空濛拂袖移時立巡檐猶自費幽尋  
盡日千回繞樹吟浩然騾背林逋鶴可得知心似我深

庭梅

遶屋親栽樹已成開時日日傍花行曉寒人起香初動  
夜靜鐘殘影獨橫碧玉欄邊春黯澹水晶簾外月分明  
不須樽酒頻相賞煮茗攤書逸興清

園居秋興

背郭臨流構小堂身閒長得看人忙白蘋紅蓼依秋水  
黃菊丹楓送夕陽隨意烟霞供笑傲忘機鷗鳥共徜徉

年來詩思渾消盡詩墨還鈔肘後方

理琴

閒窗夜靜薄寒侵金鴨添香理玉琴流水潺潺人寂寂  
透簾殘月是知音

陳珮

字懷玉安徽天長縣人太守陳于豫之女適江  
都江昱著有閨房集

唐建中陳夫人傳略陳氏名珮字懷玉天長縣人揚州江賓谷配也父諱于豫康熙戊辰進士歷官兗州知府氏生而淑慧五歲母教讀內則七歲熟毛詩識聲韻十歲詩云惜花有夢疑春雨愛月多情怕晚雲聞者謂其謝女類也天長令潘故兗州門下士數過咨吏事輒賞氏詩嘗



欲為覓佳婿會江司馬岱瞻公以事至邑潘素  
重其碩德知其諸子有文乃置酒延司馬與充  
州會兗州與司馬相得歡甚司馬以第七子為  
兗州婿即賓谷是時年十八歸賓谷居常端敬  
柔婉事舅姑尤謹織紵盥必躬自率作日子  
婦之職烏可盡委婢僕賓谷讀書務棲逸坐處  
焚香掃地與氏相敬一日讀世說至謝公捉鼻  
語劉夫人氏曰惜哉至郝隆答桓公氏曰良然  
賓谷心折之賓谷好友士氏竊於墉隙窺之謂  
賓谷曰今人才致何故不及古人正可不煩識  
度勝賓谷默然雍正丙午兗州既卒舊所識官  
以賊繫逮公訛言籍公家氏聞不變容色日先  
大夫清白恪共何有此人服其明智其姒虞封  
妻程氏工詩互相廢唱先卒氏嘗以在昔多名  
媛詩今其人非不有惜多散沒屬程共輯未竟  
氏詩幽艷學晚唐名閨房集與程集俱未見其  
諸姒善其謙順亦常并女紅焉居苦疾有憂生  
嗟丁未夏特甚冬母萬孺人來猶強言笑作善  
狀後遂不起戊申二月一日卒年二十二僅為  
賓谷婦五年

江昱亡妻陳氏墓碣陳氏名珮字懷玉天長縣  
人康熙戊辰進士歷官兗州府知府諱于豫第  
三女天性孝友聰明父母絕憐之兗州公老疾  
氏兄遠官弟幼唯氏侍能順意旨不朝夕怠公  
嘗語為女若是後為婦知不愧年十八歸余孝  
敬婉婉克承堂上歡余性素卞急氏於事過輒  
深勸當其時頽然順善也事物巨細及進退容  
止咸應儀則其賢淑如此生平菲弊自甘跡近  
於鄙而未嘗私有寡默好靜遇人獨冷而人樂  
親之精茗饌工組繡而不自為口體篤嗜吟咏  
殫思出之而究不以示人其清况又如此雍正  
六年二月一日積疾卒於家年二十二三月望  
日葬於天長縣北雁落堆耐於祖塋之右三十  
步嗚呼人不可以無年况女子乎况其死而無  
後也是不但短於生前之年并死後之年亦僅  
矣年之脩短誠限於天若夫嗣允又安知予之  
必有後哉故於其手纂日閨房集雪香詞皆序  
而刻之以吾妻而存將以存吾妻矣卒之日既  
句傳於天門唐太史比復書其畧於墓後之覽  
者尚其鑒予之哀而不加毀也



方求愉陳夫人誄哀茲靜女靈毓天真致高遺  
世姿秀出塵謝才堪媿辛智克倫婉而惠下順  
以豫親迨茲占吉乃爾贅秦和鸞鳴侶挽鹿驅  
輪方稱佳婦遠隕碩人孫荆哀感荀倩傷神情  
繫緣斷珠沉玉泯載  
名女冊垂德貞珉  
瀟湘聽雨錄安鄉令金匱鄒君健出其聖善倪  
宜人素玉字無瑕冰壺草詩詞清婉不媿大家  
宜人卒年三十四子三人長儀次則大令也今  
集乃其昆季副墨以行者有子誠足貴哉余室  
陳早歿有閨房集為吾姻許綠淨夫人敘刻昨  
任長沙書肆見別裁集選入數首或可挂名不  
沒因讀冰壺  
草附誌之

春日侍兩大人遊西園

暮春節氣和鳴禽悅芳樹良辰侍板輿駕言西園路短  
垣翠微出曲磴羣芳聚維時晨雨收古藤墜香露妙賞

豁心胸琴書博佳趣歡宴不知罷天真暇多娛

同賓谷坐月

秋天淨纖雲華月吐空濶琴餘啜清茗幽語雪煩渴坐  
久涼風生殘荷光露潑人生貴適意安所問窮達不聽  
隣家砧聲聲怨天末

夜過露筋祠

夜過露筋祠明月光皎潔祠下水瀾瀾纖塵不敢涅男  
子生而重忠孝女子生而重節烈當時嫂活今何存野  
草狐狸穿斷穴此祠可比懷清臺史冊不書終不滅

秦郵舟中晚眺



摘芳集 卷二十一  
曠宇忽然晦茫茫湖水平昏遠拖涼雨脚時漏夕陽痕野  
艇爭收港荒城早閉門倚窗凝望久鄉思黯銷魂

訊程夫人病

病魔奄忽到春深閨閣相關意不禁半榻茶烟人寂寂  
一簾花雨晝沉沉難言憔悴非詩累最感淺苓費橐金  
綠綺塵生知久閉拂絃聊與破煩襟

書室新脩率題

沉沉庭戶晝無譁景况居然隱士家滿院東風飛燕子  
一欄春雨卸桃花吟餘自愛爐香靜睡起偏宜茗味佳  
安得清閒長領受不教流水悞年華

題賓谷味蘭圖小像

君子宜幽蘭幽蘭宜君子於以結同心真味穆如水

秋夜

中庭露氣清香繁桂花發孤鶴閒於人蕭蕭立明月

瘦菊爲小婢作

瘦菊依階砌簷深承露難莫言根蒂弱翻足耐秋寒

哭程夫人

忽駕青鸞迓碧虛瓊花吹折痛何如脩文應是才人盡  
徵到姮娥舊侍書

錢令暉



字亞芬江蘇通州人詩人錢五長岳之長女也

與妹令嫺唱和著有紉蘭草

五山全志錢令暉字亞芬岳長女九嫺從孫女也天姿秀越穎慧過人自幼依父誦讀典墳婉婉聽從一若十年不出姆教者著有紉蘭草如干卷

春日遊狼山

芳洲新綠長蘼蕪連袂山行石徑迂雲繞曲巖開畫閣  
天連絕頂挂浮屠松鳴彷彿人吹笛浪卷依稀女弄珠  
閒憇幽亭舒眺望江花冉冉映紅襦

題畫上紅白桃花

武陵春色滿城開賺得漁郎洞口猜道是彤雲千片裡

嶸山何處雪飛來

錢令嫺

字幼靚錢五長岳之季女也著有珠唾集

五山全志錢令嫺字幼靚岳季女也性情溫淑喜吟咏每與女兄令暉倡和竟夕益以父姊為師資有謝家風範所著珠唾集如干卷

樓居偶成

一竿晴旭上簾鈎點點寒山翠入樓多病懶裁鸚鵡賦  
薄寒初御鸚鵡裘香浮竹葉杯中影吹徹梅花笛裏秋  
平楚蒼茫驚欲雪澹烟如織迥生愁

水仙花傍竹



水仙花傍竹垂枝綠影空濛浸月池似贈洛神螺子黛  
供他對鏡掃雙眉

劉氏

秀才劉振女著有寶田堂詩

句

雪飛忽滿徑入夜合瑤天

王汝琛

字瑤娟奉天三韓人也

斷炊日讀書

塵世渾渾兮俗眼茫茫乾坤浩大兮各有行藏至人存

誠兮不在色莊大道昭昭兮修之吉祥我心自許兮坦  
然順適冰霜貞潔兮堪比圭璋蓮葆馥郁兮名方君子  
不染污泥兮豈並羣芳誰能識我兮於我無與不是知  
音兮於我何傷恕人責己兮能耕方寸去短存長兮何  
用不臧境之不足兮惟富與貴志不在此兮饑饉無妨  
包函宇宙兮人天莫測樂我詩書兮發其古香

春夜與女兒張瓊瑛談禪理

林下夜沉沉萬籟肅空境之子欲逃禪好參花月影

春日卽事

濛濛細雨杏花村不解酒人幾斷魂行過前溪更回首



一山烟色傍柴門

顧瑩

字素先號青湄女子江蘇長洲縣人顧潛夫之長女也適無錫華惟蕃著有青湄遺稿

顧三典青湄小傳略從祖姑諱瑩字素先自號青湄女子姓顧氏余曾叔祖潛夫公之長女也七歲潛夫公授以孝經內則能解大義稍長好學能詩文雖襞績緘縷皆以筆硯自隨凡五經左國史鑑及漢魏唐宋諸家集莫不博涉于是女紅所得悉以購書年及笄歸華翁惟蕃華翁為錫山先生季子有聲庠序人咸謂之佳偶云初潛夫公家儒旺里距翁所居鷺湖隔衣帶水少曾讀書婦翁家為秦贅方翁之就學也攜卷帙囊笈纍纍潛夫公見而笑曰簡練揣摩安用是翁曰唯當手鈔之曰無事矻矻也出鈔本數十卷筆致秀媚娟好而行墨嚴整若積十數年

精力所書者翁意即君輩為之然未之悉也既結繭見吾祖姑書別紙始知曩所讀本盡閨中筆翁驚喜以為奇自是翁讀書作文祖姑必從旁吟咏積久成帙然鎖篋中間為子姪輩傳寫聞之恚甚翁問其故曰內言不出於梱也及華翁尊人歿潛夫公亦相繼逝翁攜家歸兄梁溪先生視學黔中乃傲裝從之黔南是時子女俱幼一切門戶事皆祖姑持之日不暇給然詩格益進每遇春風秋雨花晨月夕輒形於言其懷遠曰天涯望斷重雲合未識何方好寄衣咏梅日殷勤分付東風道畱取清香待主人得風人之致潔飲膳庀脩脯以待塾師夜分燈火兒女團圍則各談書傳中故事一笑為樂翁歸二子迎門儼如成人鄉黨歎服焉癸未重九忽夜夢青華府主者召赴詩會至則樓宇非人間且日待子掌箋奏覺而告翁曰時至矣越九日晨起猶誦李太白上元夫人之句俄頃整襟端坐而逝得年五十有六



拱聽教間言吳中多佳士閨閣中班昭謝韞頗  
亦不乏而青湄一編其詩詞爲最余退而識之  
乃徧求其集不可見今年春沈子渭梁以其兄  
宰沅陵翻然來遊聆其緒論真博雅君子也語  
及青湄集卽其外母顧夫人所著余不禁驚喜  
亟請而讀之清新閒雅其感懷幽思得詩人性  
情之正閨閣中誠不多觀者異矣余於是集求  
之十餘年不可見卒乃見之于蠻烟瘴雨之鄉  
豈非物之相值固自有其時有其地耶沈子赴  
槐黃將舉以付梓于其行也約數言以授之

### 七夕

漢殿穿針夕填橋鵲報秋無端經歲別有意隔年酬淚  
雨銀河滴愁心靜夜流天邊尚如此人世又何求

### 杏花

一枝紅杏映香奩艷色欺人繡懶拈睡去海棠嫌嫵媚

舞來楊柳笑輕纖烟含薄霧容偏麗雨抹新粧暈更添  
莫使暖風輕扇盡忍看紅雨灑珠簾

### 遠遊黔陽言別

淚滴羅衫泣杜鵑官亭拜別意懸懸雲橫萬里長江水  
擬共愁思捲暮烟

### 咏梅

蕭灑丰姿自出塵天涯難寄一枝春殷勤分付東風道  
留取清香待主人

### 夜闌

夜闌靜坐小窗紗香燼金猊蠟照斜燭淚亦知人有怨



垂垂吐出斷腸花

魯湘芝

字慕班浙江會稽縣人母卽劉淑慧適山陰孝廉劉以垂著有慕班詩草

清明書感

又是春郊禁火天可憐芳草滿晴川隄邊柳繫王孫馬  
橋外烟迷倩女船昆海當時驚異俗鑑湖此日思華年  
風塵踪跡如蓬轉不及沙鷗自在眠

銅人

赤帝山河蔓草蕪無人敢問昔規模承光盡是金魚珮  
惟有銅人血淚枯

木馬

元機一點許誰知木馬流行巧構思萬騎平原馳驟處  
直將朽腐化神奇

邵笠

字澹菴江蘇泰州人詩媛徐啟秀乃其庶母故  
澹菴工吟咏適黃杜若秀才中更家難四壁蕭  
然澹菴惟爐香茗椀靜坐讀書病中悉焚其稿  
故流傳絕少

和夫子貸米詩



莫以貧爲病吾儕本寂寥餅罍雖久罄意氣不全消張  
子仍存舌陶公肯折腰有隣難貸米相對慰清宵

新柳

春雨連朝夕開軒柳色來纖腰猶怯舞青眼未全開葉  
葉舒新綠絲絲挽落梅未堪持贈遠詩意好相催

題美人對弈圖

偷閒石畔賭圍棋暗卜桃天速與遲勝負全憑先一着  
沉思頻自掠蛾眉

題鶯鶯聽琴便面

春風隔院暗相邀爲倩絲桐代玉簫見說畫工能畫照

琴心試問可曾描

林文貞

字韞林福建莆田縣人適安徽宣城縣諸生王  
期著有韞林偶集

春遊石泉

仲月春始和山空風色靜數里聞水聲豁然入靈境溯  
流尋神源圓折紛珠迸唯唯見魚樂鱗鬣自適性至哉  
蘇門人幽懷誰與并

寄王玉映詩

川陸鬱以紆山陰有名媛門閥舊金張流風存筆硯鐵



網下珊瑚蘭心落釵鈿詩畫咄驚人衣香惹紈扇時見扇頭

畫揮毫金石堅染素烟嵐絢彼哉冠帶雄三舍避時彥

閨閣能幾人四海不相見蹇儂生下里雙鯉乘風便遙

夢曼琅玕澄江一淨線

圖繪寶鑑林文貞宣城人適王茂才諱期者文貞寄詩紈一握并秋蘭數筆于王玉映夫人其詩云云

### 寄燕京

曾記燕京路三千里又多郎今二月去春日等閒過

### 夫人索詩漫賦絕句

蘸粉調脂江上來綵毫紈扇重徘徊芳名藉甚深閨裏

不遣簾前鸚鵡猜

南國西園姓字香風清月曉浴鴛鴦同心鄂被餘香熱

霍玉爭誇嫁十郎

### 題紅拂圖

俠概情腸雨暗通年年閣淚怨臨風輸他一拂傳佳事

早見人間李衛公

### 張蘭

字畹香江蘇揚州人婁拱星之室也

### 贈鄭玉姬

窗前初辦曉粧成新試春衫媚自生為見艷姿因感昔



感予年少更憐卿

蔣永端

字含章浙江秀水縣人適嘉興縣沈芳洲著有

焚餘草

李集焚餘草序略曾王父秋錦公與丹崖先生為中表兄弟兩家子弟歷數世交好無間蔣子中起丹崖先生曾孫也中起有妹字含章適禾中沈氏余內子中表弟也抱夙疴不事事含章孝於姑善事夫子十餘年而歿成黨痛之於奩其中得詩百篇中起緘視余余三復之惻愴空侯瓏玲哀玉可謂怨矣怨固詩人之旨也憶余祖姑適祝者幼時詠雪云自甘潔白雪泥住莫學楊花滿苑飛余祖愀然曰兒志可知然何不祥也後果以節著含章海棠詩云香魂縹緲頻垂淚月魄徘徊早斷腸何其風調差相似耶所謂詩識者非耶至其內行則中起自為之志予

略而弗書而述兩家詩教之畧同者以序其端

梅影

誰道吟梅易尤知鑿影難香心臨月杳鐵骨浸波寒入鏡寒相對窺窗雪未殘江如靈乍返莫作美人看

元日

懶飲屠蘇酒生憎爆竹烟催人生白髮不使復青年歲去愁難去春還運不還年年更節序似我慙綿綿不用桃符掛休將雞索懸平生無愧忤何懼崇為纏

咏艾虎

醫王奇術忽翻新針灸潛調李耳神體蘊真香羞賈午



腹無文藻愧唐寅慣隨蒲劍驅妖魅可佐龍舟弔水津  
只恐移時終委棄虛名徒負武功臣

次韻題松陵文史沈關關繡小青遺照

玉骨冰姿是也非芳魂於此得憑依一從織手傳神出  
恍見霓裳金縷衣

別館淒涼鎖綠蕪香銷玉殄慟仙妹鴛針繡出婷婷影  
可有人來藝畫圖

陸 媿

江蘇上元縣人適孝廉張永賢

秋日登采石磯

今日天氣佳涼風散林邃憑高眺大江雪浪浩無際緬  
維李謫仙放曠適心志百篇斗酒間萬言馬可倚力拯  
郭令公醉屈高力士呼來不上船欲殺世所忌訛傳捉  
月狂采石魂長逝古人既云遐古蹟今猶在晴鷗沙渚  
飛落日山滴翠留連憺忘歸無窮懷古意

湯素畹

字雅卿大都吳嘯雯之室也

丙戌除夕

病餘弱質困風烟鬢入今宵怕說年臘盡不知秦歲月  
春來猶見越山川何勞茂草牽鄉夢自有梅花作客緣



眉案未輸鴻與耀只愁時事正紛然

柳亭詩話湯氏素晚字雅卿大都吳嘯雯婦也僑寓吳中以避風鶴之警丙戌除夕有詩云云筆筆藏鋒可云哀而不怨微而婉也

張氏

江蘇奉賢縣人適國學莊肇龍

感懷

停繡窗前坐思親淚滿襟不知春已去猶自看飛禽

奉賢縣志監生莊肇龍妻張氏尚書駿之九世女孫南橋人也善吟咏多秀句其感懷一絕句云云人多傳之惜不永年篇什遂少

沈蕙玉

浙江金華縣人江西周祖成之繼室

憶母

河廣難期一葦杭思親凝望樹蒼茫潯陽江上秋潮急直送離心到越鄉

李氏

字淑瑩河南洛陽縣人詩見國朝詩選

柬外

憑几脩書寄便鴻詞箋恨短意無窮離懷正值深秋月紅葉青燈烟雨中

陸瑞玉



字覺菴江蘇長洲縣洞庭人顧御六之室也

七十二峯足徵集氏名瑞玉字覺菴陸鳩峯先生之女適吳門顧御六治家訓子之餘遊心翰墨晚年奉佛惟謹參究竺典衝口成詩類於偈者居多

### 石湖與吳夫人言別

雨過晚天朗雲邊見斷虹船浮新漲碧帆帶落霞紅月自何時串橋還八面通含愁斟別酒兩槳各西東

### 答吳夫人

西望東峰烟水中伊人宛在杳難同遣愁正唱陽春曲憶我遙緘白雪封夢去不隨巫峽雨飛來難趁鯉魚風南村美景真堪羨蓮葉如雲映碧空

### 懷吳夫人

北牕時挹桂花香籬菊茸茸又吐黃此際思君無限意一簾風雨近重陽

### 季嫺

字靜映號元衣女子江蘇泰興縣人吏部主事

寓庸之女也適李長昂著有雨泉龕詩

婦人集昭陽季夫人名季嫺游心元虛託情道味賦詩不多殊復令人咨盡可謂德音

詩觀靜映夫人有德有言亦儒亦釋彈極微奧獨綜雅南洵女士之楷模貴盛之儀表也採其數詩用垂藝苑

奚足以盡之

陸雲龍雨泉龕集序神媧鍛頑巖以成質飛五色彩麗雲霞羸女託寒篠以次音應六律韻嗜



鸞鷲唯是文心肇闢遂爾逸響相繩虎齒發嘯  
於瑤池虬偈流梵於竺國至性嘗侈娥江黃絹  
色絲異藻非宣雋頰母儀亦稱荻畫青編彤管  
芳詞不著棘心若夫胡笳想蔡統扇推班閱錦  
紋之縷錯絲旋文情瓊煥讀絮咏之致悠態弱  
雅思飄颻豈直負辰清吟金輪輝爭火藻當爐  
緘怨臨邛艷鬪鸚鵡杼就七襄戶藏天錦吟安  
五字人握隨珠雖壺閔夢戍品題亦見鍾譚迺  
昭代人文聲價必歸王謝昭陽靜姨氏撒鹽讓  
嶺蘭玉森太傅之庭弋雁興歌柔荑起碩人之  
頌家闕閱而氣高山林身巾悃而行衿士東方千  
騎喜夫壻之居高南國一枝羨寧馨之早占爲  
復詩詞夙擅翰墨多靈跡希太白步恥易安鷓  
聲啼夜月疑同鳥哺之篇棣萼漾東風莫擬鴿  
原之什寫花嬌而出韻繪月態而摹神樂欲爽  
心悲能下泣境超玄著脫有化工誰曰蛾眉不  
讓定知焚筆硯以相師卽合蠡測不深亦將撫  
几案而稱絕其姪廷尉清子觀察淥俱誌其集  
世行

張茂枝雨泉龕集題詞昔有文媧氏天傾煉石  
補五色付天孫巧織雲錦縷繫昔少昊氏厥母  
曰皇娥乘桴遇白帝倚瑟著清歌天地何無人  
柱維聽其折明璫吐霞秀百臣咸遜列天地何  
無人文章不自詡萬象紛杳冥翛然辭翰祖相  
傳漢大家班姬與蔡琰藻修合史書筆讀中郎  
醖昔有左貴嬪名與兄思兼昔有謝道韞柳絮  
勝撒鹽嗣美固多英徽音不足快今有元衣子  
貌若姑射仙寂寂澹容與一龕對雨泉左手持  
貝書右手射仙寂寂澹容與一龕對雨泉左手持  
然卻榮勢日手一編龕中間咏嘯賦就百吟  
篇清言翔逸藻柔翰響幽潺素質叅紅卉雋姿  
麗芳媽在晉爲惠連在唐爲岑參在明方季重  
友夏差足肩母固大家子少歲攻書傳阿父吏  
部郎阿翁大宗伯三弟管子少歲攻書傳阿父吏  
夫任嵯政今年三十四一子秀丰姿十五登書  
賢余屬通家子承風拜蕙筵  
伏閣願受書命歸從筆研

河中之水歌



河中之水滔滔疾流汨我田苗嚙彼高邱河魚大上萬  
民以愁我謂河伯伊誰之羞苔苔佚女抱持篋篋哀聲  
入雲長歌未休何辜今人癩疾曷瘳

種蘭歌

梯山曳露鋤雲根芟芟披荆得幽節雖然數莖花無多  
已覺色香堪獨絕窗前偶有黃磁斗一似先爲種此設  
養以綺石永若芳挹彼清泉溉其潔蘭兮蘭兮如有知  
孤標何必藏巖穴

得天中弟訊

憐爾關山隔書從塞北來黃雲瀾大野白草遍荒臺風  
勁豺狼嘯天高鴻雁哀登樓應有賦何日共銜盃

秋興

昨夜梧桐落倚樓朝來園菊已生秋風吹鐵馬聲聲急  
露冷銀床處處幽遠寺鐘疎依澗寂空庭香細傍簾浮  
蘆花影浸江天月不待飛霜盡白頭

病中述懷

怨極翻忘怨愁深不解愁臘殘猶自病塵滿讀書樓

客路

客路雞聲促曉程暮歸殘月樹梢橫徘徊欲作思鄉賦  
愁集毫端寫不成



秋色

林木蕭疎噪晚鴉斜風欲透小窗紗莫憐秋影偏岑寂  
紅葉飛飛似落花

吳綠蘭

字幽芳關東人詩見吳吉人名家詩選

立春日剪彩為花

應候天葩早先時報好春吳綾裁處暖苑樹綴來新蜂  
抱香非麝鶯窺葉似茵應知剪花女原是散花人

窗前梨花

春風披拂颺絲輕枝上花開分外榮豈有細香迷紫燕  
却將絕色待黃鶯盈盈白照西施面淡淡嬌含虢國情  
窗下莫嫌頻倚望一年寒食幾逢晴

茉莉

晚掠雲鬢花正開喜看香雪近粧臺凡葩亦有顏如玉  
那得清芬撲鼻來

任婉

字靜宜江蘇揚州人適王子莊詩見十才子鸞

嘯集

韓矩任靜宜詩序蓋從來閨秀之詩不過粗知  
聲律對仗之大意原無甚精思實義也一日者  
王子莊讌余於庭席甚盛笙歌間作日未夕酒  
極酣王子置一卷於前亟呼其輩掖嫂夫人出



云子與余忘形也雖異姓而骨肉者俾余內子  
以通家之禮見子也余內子酷喜讀子詩寒暑  
晨夕不少輟惟嗜子之詩也深所作欲乞子弁  
言余領之趨揖前視視衣香鬢影中兩頰俱赤  
弈有光宛然始射之神人踏絳雲而馭輕風矣  
余肅退展其帙讀未終篇擊節起舞蓋鎔鑄唐  
人諸大家之詩而自詣其至者也柔克沉思超  
越神警筆拔蘭香字飛孔翠噫技固至此哉余  
因之有感矣彼夫鬚眉丈夫之所號為詩人者  
禍棗災梨曳裾投費走聲名如鷺以高視壇坫  
之上開函塵空滿紙亂頭麤服之不修飾濃  
點淡抹之不勻停汗漫滄雜之無軌度嘗竊嘆  
假詩人之彌塞天壤也余雖不能詩日取歷代  
詩以磨淬之疏其源而淪其支不能詩日取歷代  
人以實其見知未傳臨濟之一燈終墮落野狐  
禪耳人可易云詩也乎得王夫人詩讀之心目  
皆豁然洞開恍身入波斯藏中探木難火齊而  
由王子才亦差相敵而尚覺夫人過之王子勉  
乎哉何以轍芳競爽也  
用不辭駑鈍而為之序

初春卽事

篆靄湘簾潤波光曲抱楹山雲含雨氣林鳥變春聲茗  
熟琴心古花香蝶夢清半窗風動處松子落棋枰

雨中登樓遠望

遠野陰霾合登樓入望賒冷烟癡夢蝶細雨醉春花雲  
壓山千疊波翻水一涯綠楊鶯不語枝上獨喧鴉

上巳

省城村墅草如茵宿雨初收曉色新青嶂馬嘶迎社客  
綠波艇戲祓除人烟薰日煖鶯啼樹花落泥香燕舞塵  
千古蘭亭傳勝事風流猶憶永和春



寄黃夫人

烟昏停繡帙倚檻憶同盟知爾香閨裏春星一樣明

曉起

香魂正逐煖絲遊篆靄濃烟擁畫樓鶯喚曉窗春夢醒  
一庭花氣上簾鉤

胡蝶

海榴枝上獵新紅美爾翩翩善馭風曾憶淡雲疎月外  
嘯烟騎入蕊珠宮

沈清文

字里未詳

絕句

晚天移棹泊垂虹閒倚篷牕問釣翁為甚鱸魚低價賣  
年來朝市怕秋風

一騎漁陽飛羽檄宮中還認荔枝來漢宮多少如花女  
不嫁單于君不知

隨園詩話唐無名氏詩云烈風拔大樹未拔根已  
露上有寄生草依依猶未悟本朝女子沈清文有  
絕句詩云雖詩用意不同而託諷俱妙

孫玉貞

江蘇婁縣人諸生孫某女

句



來宵樓外三更月空照梨花一樹春

水曹清暇錄婁縣諸生孫某女玉貞工詩十五天折臨歿有司云云同邑張茂才與載輓詩云明月梨花景利那微之悼女淚痕多奩遺鴛結師心巧詩勝龍褒信口哦閱世偏憐年歲促遊仙半是病愁磨他生須做紅樓客慎莫當歌喚奈何

擷芳集卷之二十二目錄

才媛詩

古歛認菴汪啟淑選

許冰素 四首

徐氏 三首

馬淑禧 一首

黃憲 一首

錢紉蕙 五首

吳氏 一首

易睽娘 二首

霍雙 二首

趙蘭好 一首

李瓊 一首

汪又蘇 一首

陸莘行 一首

夏氏 一首

余子玉 二首

王氏 句

潘楚碧 三首

張蕙 二首

王蕙增 二首

顧志 二首

袁彤芳 二首

吳徽 一首

徐淑秀 一首

商采 十四首

王璐卿 七首



王 氏 二 首

周貞媛 四 首

顏 玉 一 首

蔣 紉 蘭 六 首

擷芳集卷之二十二

古歛訥菴汪啟淑選

許冰素

江蘇長洲縣之洞庭人著有遜雪居詩草

七十二峯足徵集冰素東山許靜曜先生之女  
適郡人李次文幼承庭訓通詩書與乃兄宸卿  
乃弟少卿相賡和  
有遜雪居詩草

茶熟

淡綠濃香帶露浮竹爐響絕小窻幽香飄翠幙連書幌  
綠掩湘簾映玉甌漫拂瑤箋消永晝愁看雲樹上層樓  
鄉心無奈連朝切茶熟空思午夢遊



送別牡丹

飛來瑤島仙家種却喜還教老眼看香影戀人新月澹  
胭脂鋪砌落霞殘太平天子千秋恨曠達莊生一夕觀  
消受自慙清福分醉吟留得碧琅玕

探梅

路入羅浮玉滿林幽芳馥馥襲衣襟瑤臺人去留真境  
雪裏何妨獨自尋

芙蓉

扶疎綠葉擁紅香占盡秋江兩岸芳想見浣紗溪畔態  
碧波如鏡照新妝

徐氏

山東長山縣人長治令徐繼志之女適新城縣  
布政司叅議耿鳴世卽都御史庭栢之母也

輓王烈婦畢孺人

烈矣王門婦賢聲著帝京貞心同玉潔素質宛冰清取  
義邱山重捐生一羽輕恩承明主詔千載播芳名

偶成

時近清明二月天嬌花粉竹正鮮妍秋千架上人如玉  
溪水堤邊柳似烟紫燕飛飛歸畫棟白鷗點點浴晴川  
年來景物還依舊不見人生再少年



居易錄吾邑耿太淑人徐氏長山人巡撫僉都御史以貞孫長治知縣繼志女陝西叅議耿公鳴世之配巡撫浙江僉都御史庭栢之母也幼讀書工詩偶記數篇于此輒王烈婦畢孺人云云偶成云云其篇什最多壬午亂後盡散佚矣

寄子詩

家內平安報爾知田園歲入有餘資絲毫不用南中物

好作清官答 聖時

池北偶談吾邑耿侍御省亭鳴世妻徐氏都御史華平庭栢之母也有賢行能文章兵後失其集僅傳寄子詩云云有德之言與撚脂弄粉者迥異

馬淑禧

號墨華子浙江會稽縣人瑞州知州馬維陞之

次女也適全邑陶澍

感懷

朝來無力倦臨粧睡起遲遲日影長忽報春光今已盡  
含愁強步小回廊

黃憲

詩見水香園題贈集

題汪氏水香園

阮溪花事占春妍臺榭差池映碧漣黃海雪消香拂地  
紫峰雲散影橫天微吟擬訪呼猿洞清夢應隨載雀船  
管領風光依舊好不須重費買山錢



錢紉蕙

字秋芳號清蔭居士江蘇吳縣人太史錢中諧女適武平令許廷鏞著有清蔭閣集

國朝詩別裁集錢紉蕙江南吳縣人太史諱中諧女武平令竹素許廷鏞室竹素以詩鳴吳中今之魯靈光也厥配亦高風格趨步唐音

度梨關

迢遞踰梨嶺肩輿勝兩駝雄關限閩越幽境極東南地  
暖常多雨雲開忽作嵐鄉間望不極聊復上塵龕

野望

偶向東郊望蕭條物候非雲連山一色木落雁同飛歲

月愁中促音書天末稀感時情不極惆悵返柴扉

新安江行

乘潮渡漁浦沓嶂夾江濱下瞰綠波影能令纖芥分筏  
移疑入鏡確落自春雲聽盡潺湲水灘高易夕曛

征怨

萬里胡天斷鳥飛年年策馬未言歸西風吹急笳聲咽  
歷亂黃沙滿鐵衣

秋柳

江潭憔悴幾枝橫秋雨秋風愴別情猶擬攀條貽遠道  
可憐玉笛不成聲



吳氏

安徽無為州人侍郎吳覺庵孫女謝鶴樵之配也著有梅閣小草

歲暮喜張鐵崖吳柳邨兩堵過我東墅村居賦此索和

烏啼霜落不知寒剪燭傳杯夜欲闌冰魄光華窺几席水仙香味襲盤餐村荒車馬經過少歲迫親朋聚會難笑向東牀覓佳句良宵莫作等閒看

易暎娘

江蘇吳江縣人本世家女以所配不偶抑鬱而

死年僅二十四歲

別父

漂泊何由返故園桃花春雨照離魂憑將別後雙紅袖記取東風舊淚痕

集唐

蚤是傷春夢雨天鶯啼燕語報新年東風不道珠簾隔引出幽香落外邊

觚賸暎娘者姓易氏居松陵之舜水鎮祖某以闕閱世宦累貲億萬其父某盡散其貲蓄古名畫環室為香木城城有十架架藏百卷為率各以鏤金牌記之其錦韜玉軸者為最品暎方四五歲性聰良善記誦父嘗戲舉古人性名印以所作某畫暎即指第幾卷中靡不悉符父以是愛之令其掌鏤



金牌而司畫城呼曰畫奴長及齒齷作花鳥小圖  
 工刀札善吟咏姿體絕麗未嘗假粉脂而浮香發  
 艷盈盈欲仙星眸流離遠黛明媚復媽然善味故  
 其母氏更畫奴名為睽娘明甲申歲海內鼎沸兵  
 燹所被諸郡縣皆陸沉秋八月睽與父母夜飯罷  
 畫檻間列繡燈圍以紫絲步帳月光掩映簾幙睽  
 方研墨濡穎手摩吳道子畫觀音像將賽於隣側  
 醉香庵施其庵之女冠未舉筆忽聞號呶成雷燎  
 火四張外宅大呼曰兵至矣兵至矣睽倉卒入內  
 閣取畫城之錦韜玉軸者持以出從父母走僻巷  
 中潛達金牛村居金牛村三載賣珠以綴衣傭繡  
 以佐饌備旅食之困時舜水廬室悉為灰燼亂稍  
 定睽父將理故業而無資可繕睽泣然曰吾家世  
 業隆大不幸蹈於離亂煢煢寄非長策也聞女  
 之姑在午溪東新巷姑以艾孀守貞女可就訪合  
 居共為晨昏女裝中有古畫十餘卷售之當得千  
 金父以其值稍葺故廬而新之女時可從父母從  
 容完聚耳父然之為買小舫從一女奴曰問香賦  
 詩淚別云云遂至東新巷次於姑家姑字倩娘夫  
 家姓言氏於新巷亦豪族倩夫以癩疾之病走死

亂軍無子倩故甚愛睽娘視睽娘若子也倩有表  
 之自出潘生緒其親與倩乃異姓之叔嫂生故世  
 胄其父母以行穢見黜於族儼倩之側舍以居生  
 能詩文然無士君子行窺倩寡居閨寂日以事請  
 見睽目哆口欹肩攝足以意挑倩娘倩意惑焉  
 久而相悅睽之臥室去倩之臥室可百武在東廂  
 小紅樓鎖簾閉幃旦晚不下樓級倩之事問香稍  
 知之以告睽睽嘿不應倩之家有一園名隔夢景  
 頗幽勝時暮春初旬倩娘辟諸女從邀睽娘往遊  
 睽辭以午繡方倦倩頻促之乃啟隔夢門轉曲池  
 上小山左側憩半峯亭綠柳數樹紅欄三折茶以  
 竹鑪碁以石磴復轉而行數十武一徑皆櫻桃花一  
 徑皆薔薇花倩曰櫻桃未子而花容少媚不若薔  
 薇紅香足愛也挈睽左腕低扇微笑乃至薔薇架  
 下瞥然一聲片花亂舞落花滿鬢鬢間垂垂拂衫  
 袖有細彩流蘇貫相思子綴以同心鳳凰結雜花  
 而墜中睽之右肩睽驚愕隔花望見一生鳥中倩  
 容凝睇於睽問香遽呼之曰潘秀才從誰來耶倩  
 娘曰潘郎從櫻桃徑來耶郎素不識睽娘何敢唐



突西子生視而笑倩亦視生而笑遂散去昧知倩  
 之賣已也顏顏不憚者累日蓋倩娘素悅於生恥  
 昧之獨為君子也故潛生於園以俟昧之至將市  
 穢於昧倩知事不可諧於是始不憚於昧而為生  
 計益深一日昧娘曉粧方竟綺窻無事偶疊紅牋  
 作細字集唐句成一絕云云蓋隱刺倩事也書畢  
 以玉篆獅鎮紙忽聞樓級有履聲乃倩娘至昧  
 拾往連屨趨迎倩紅牋詩猶在鎮獅下昧急取置  
 鏡臺鎖榻內而尾紙半露倩出讀之納于杏衫左  
 袖遽下樓級昧止之不能惋悒而已倩出中堂適  
 遇生於梧桐軒下倩出賤于袖望生而投曰櫻桃  
 徑上有援琴之挑梧桐軒中乃無擲車之果耶生  
 舒賤展視乃絕句云云後有畫奴戲草四楷書倩  
 曰畫奴是昧娘小字紅牋是潘郎良媒也生攜賤  
 而去後累日新霽始涼金風初扇沼荷零香庭草  
 妻綠昧孤坐凝眸惘惘有思歸之意見問香攜斑  
 竹鎖絲籃置畫金小方奩進曰倩娘以為娘午  
 茶少潤詩脾開奩視之乃石櫛子二盒金柑四蒂  
 菓盡覆奩衣下文錦幅尺繡帶雙結密緘重重  
 發緘而觀則薄赫蹠也得五十六字云珠樓十二

夜初長秋恨應知怯晚粧巫水有雲通楚佩賈牆  
 無夢問韓香錦絃舊瑟調鸚鵡蘭酒新釀憶鸛鵲  
 落月斜廊無限意可能流影到西廂篇末署云米  
 在田而可實水非米而何炊昧以指畫者久之作  
 潘字狀懣焉起立碎紙而擲于地墜髮拂衣遂往  
 見倩時倩方坐繡榻裁鳳花細鞵忽見昧以昧至  
 意必有合移席駢坐為昧整髻上墜釵昧暈臉潮  
 紅嚴容噎氣良久乃言曰姪以穉年背慈就外孤  
 跡單心托命於姑以姑之惠被以綺繡餌以珍錯  
 良厚矣乃不訓之以德而假道於不令之生傳以  
 褻詞姑縱不愛姪獨不自愛乎曩者以楮墨間情  
 染成小句姑掠而取之致以穢意見誘修筠有節  
 高栢有心豈相免也陌上之金尚不能亂桑中之  
 婦而謂紅閨流葉乃自媒於東墻宋玉哉姪非敢  
 斷絕雅恩然久安於此實敢令名請從此辭歛獻  
 再拜而起倩以好言固留不許時舜水已成小築  
 昧之父母將欲迎昧適歸驚喜道故昧所不悅  
 於倩娘者匿不以告也先是生之父為生婚于  
 王氏自溺志於倩遂背婚于王王亦以生狂蕩無  
 檢字女他姓至是生欲因倩娘求合於昧而不慊



其願故揚紅箋之詩以誣昧使聞於昧之父母因  
而求娶閨歲餘倩以他事至昧父而數目昧父  
為昧議姻口籌心語未白其人而數目昧父  
無忤色因極口潘生之才而諱其貧又附昧母  
密語昧父母嘿然相顧微嘆遂首肯之倩歸即  
生致六禮昧父母擇吉將贅生於家而絕不以  
於昧至宴爾之夕銀釭斜照黼帳高張夜闌撒  
流盼見此良人則即隔夢園櫻桃花下生也  
號慟絕而後甦問香馳去驚呼昧父母再四  
不能言良久唯曰倩娘誤我父母再四抹解  
儷之際非其本情雖勉為笑語而眉間鎖愁  
恨如不勝至居又二年生亦構數椽別墅挈  
歸生之父母窮悍極虐素知昧之不禮生也  
怒以待昧拜告方畢含啼入室意不聊生歲  
丑生以不給家食為硯耕之謀復隙窺館之  
見黜其主昧愈不禮生大慍昧叱詈之聲達  
庭戶昧支頤語生曰薄命之薄啣冤可知狂  
狂負心若此何鬚何眉無恥無禮我死為鬼  
尚能為人乎語未竟鞭楚亂下散髮蒙面流血  
眉維時明月入戶青燈熒熒昧矇目嗚咽而嘆曰

命盡此矣令問香於故篋中取愁鹽一卷詩詞若  
干首及綠牕小寫百葉皆幼時所畫花鳥粉本悉  
焚之火乃裂帛盈尺和淚為書授之問香曰遲  
汝為吾送易氏爹娘書畧曰女不幸少逢離亂骨  
肉飄依兩地異處况復長年羸病自知弱蕙易殤  
薄雲難壽然從垂髮以來溺情芸藝散志籤圖將  
謂結褵名族執爨良家俾慈幃二人得慰心於  
髮竊所願也意媒妁之欺近在至戚涅我素名  
織彼萋計致匹合瑣類終身之樂哉女自春首  
不舒愁魂欲斷豈知有生之樂哉女自春首分  
而後鬱為沈疾嘗累日一粥而見粒則嘔薄飲不  
及蠶勺悲苦之狀不可殫陳當夫蘭門暮掩薄  
中人簷雨浙瀝燈花頻落砧聲遠飄譙鼓斷續  
於斯時妻其淚零倚枕竟夕不知憂之何從也  
夫畫牕曉開麗花笑暖慧鳥爭啼凭欄數迴因  
穉年西園隨伴踏青始歸泛錦瑟於芳樓馳紅  
於細馬匏絲稠雜諧笑為謹方之今時遂若隔  
同是一身而苦樂頓異命之不猶夫復何言今  
負心人以窺踰失意遷怒於女笞楚千態垂垂  
斃無復生理爰令丫鬟問香告情父母即夜是命



盡之次父母一來垂視永以遐隔綠香帳裡豈有  
冷翠零膏紅葉腮前莫問韶顏穉齒將見柳眼露  
凝埋春化淚蓮心風折劈恨成絲明月三更天涯  
草碧還家之期當在曉風新夢間耳父母春秋已  
高強飯自愛無以女為念幸收女餘骨覆以坏土  
得以脫迹人間銷形天下梁黃槐綠烟冷雲荒遂  
畢此生矣孟光同隱未得是人弄玉俱仙徒為虛  
語獨念父母畜我不卒繞膝之歡邈矣難再梅花  
猶在額乎蓮花猶在足乎鏡臺舊影翠帷餘香姍  
姍其來遲者知是亭亭倩女魂也及晨睽父母得  
書憤駭長慟而至則睽已縊於前軒左櫪間矣生  
與父母俱逃莫曉所在睽父母及易氏諸戚乃棺  
眈於兩楹而以問香歸蓋睽之為人風神散朗亦  
珊珊流雅而幽情如緘慧心長結藝能窮巧而貌  
若不知咳唾生珠玉而寡於辯給援管成牘而揮  
染必本於性故寫愉則墨以歡露道哀則字與淚  
并蓋孝穆所謂妙解文章者也惜紫紉無托紅顏  
非耦才豐命嗇生短恨長悲哉睽生纔二十四歲  
歿後數日忽有豪士戟髯拳髮紅巾綠縵跨劍躍  
馬而馳後從碧眼奴背負血囊至睽之門排門直

霍雙

字貞秋直隸東光縣人詩見

國朝詩選

暮春

東山下林影西閣日光殘脉脉春風裏幽花生暮寒

寒食

人倚雕闌竹倚衣女桑遙聽子規啼陌頭楊柳休攀折

繫住春光不許歸

趙蘭好



字夢瑤浙江錢塘縣人詩見 國朝詩選

秋日思鄉

勝跡龍山已倦游  
傷心何日返歸舟  
願隨潮水秋風力  
飛過錢塘古渡頭

李瓊

字素華湖北漢陽縣人適海寧令楊璟菴

琵琶亭詩

並序

戊辰隨家夫子同赴海寧官署舟次斯亭登樓  
覽勝兼得徧識詞壇佳構因贅里言以墨其處  
琵琶亭上音聲歇  
琵琶亭上多遊客  
遊客羣深弔古情

可憐大半泥形跡  
一曲鶻絃妙幾何  
能令感激淚偏多  
勞臣思婦千秋恨  
好與詩人細詠歌

汪又蘇

字景 安徽歙縣人孝廉汪昌之女適儒士洪

瑛早卒著有雙桂書屋詩

抱小妹

小妹纔三歲終朝抱  
百回近來初學語  
句句我能猜

陸莘行

字纘任浙江錢塘縣人陸圻之女適海寧州貢  
生祝斐著有老父雲遊始末樽前話舊一卷



送伯姊隨任姑蘇

自憐嬌小不知詩執手臨行強致辭盼殺天涯傳錦字

吳江楓落雁歸時

許良謨海昌詩林續任能文工詩相傳七歲時送其伯姊隨任姑蘇一絕風致絕佳雖生平筆墨荒溼卽此亦可得其梗概其著述則有老父雲遊始末一卷樽前話舊一卷

夏氏

安徽霍山縣人適趙衡川才美而艷

嘯龍嶺

盡日肩輿坐雲疑足底生一峯盤級上四望覺山橫鶴去亭留影泉飛谷應聲武皇停蹕處落日暮烟平

余子玉

江蘇江寧縣人湖南觀察鄧偶樵配詩見詩觀

二集

詢梅

凍雪繽紛爛似銀冰心欲吐費逡巡江南春色知多少盼煞孤山古處人

入夢

春去秋來邊塞雁花開花落故園心明明架上雙蝴蝶怪煞醒時沒處尋

王氏



河南宛邱縣人周侍郎亮功之配

句

小雨勻溪穀閒花落釣絲

溪上

月融全昧指烟動強名絲

題顧繡大士像

剔花春影膩浣硯墨痕纖

咏侍兒纖指

秋心增半夜雨氣滿孤燈

夜坐

牽衣憐弱女學語問高堂

小女牽衣問大母平安

承花閒布席拜月自開簾

貝葉菴春日

薄命憐蟲臂全家在虎牙

聞警

半榻閒隨高樹葉一林獨聽晚蟬聲

避暑柳下

已分殘軀同鼠雀敢言大樹撼蜉蚋

圍城

脉望生前寧作蠹蒼松化後不為樗

哭父

強顏一笑全無着覲面時逢號未來

題三姊畫彌勒像

一夕綿綿億萬年猶勝人間白頭死

七夕

書影宛邱王氏十五歸予即能詩如溪上云云皆有思致詩二百餘首小詞數十首余欲傳之輒欲自焚曰吾懼他日列狡猶瞿曇後穢跡女士中也蓋自來刻詩者方外之後緊接名媛而貞婦烈女大家世族之詩類與青樓泥淖竝列每言之輒以為恨予嘉其志書而藏之不敢付梓並其名字亦不忍露也

潘楚碧

字湘文浙江仁和縣人大令顧是室也著有繡



餘吟

和劉長卿四愁詩

無端斷送好姻緣咫尺銀河已各天  
乍得新愁澆綠酒漫將舊事寫紅箋  
曉風落盡千行淚夜月拋殘廿五絃  
璧未沉淵珠未碎延津豈易合龍泉

夏日閒居

蟬聲驚午夢殘照在山腰呼婢尋寒澗  
分泉灌藥苗

咏梅

禁院寒侵集翠裘紅窗疎影暗香浮  
只添額上新妝巧不爲閨人寄隴頭

張蕙

字令畹江蘇長洲縣人

六一泉題壁

湖邊春色似當年芳草王孫事杳然  
牧馬嘶風寒夜月流鶯啼雨入朝烟  
山川有意留環佩桃李無情逐管絃  
今日登樓強舒笑須教王粲賦詩篇

重到孤山拜阿青荒榛茅棘一沙汀  
烟沉古墓霜寒骨雪壓殘碑玉作銘  
幽恨不隨流水盡香魂時逐蓼花零  
勸君再禮慈雲側莫墮輪迴作小星

王蕙增



字娥溪

孫貞媛詩

誓死貞操絕點瑕荒墳偏傲玉鉤斜芳心皎皎懸明月  
舊夢紛紛怨落花盡室捐軀惟有恨一身飄泊已無家  
殘碑斷碣今何在留得完名萬古誇

次韻題明妃圖

漢宮泣別恨紛稠一曲悲笳塞外秋不是丹青權倒置  
那知君是女班頭

顧志

字鶴■自號雉城女史

和家大兄梅花原韻

尋梅日日小樓東應事孤山信未通留影尚遲冰鑑月  
浮香豈待剪刀風肯教冷落春光裡應得芬芳夜氣中  
九十韶光容易去花神莫怯數枝紅

春園烟霧濕莓苔第一番風取次來入閣微吟宜早對  
尋筵索笑莫遲開愁聞玉笛樓中倚懶學宮粧額上堆  
咐囑兒童催羯鼓殷勤先置酒盈杯

袁彤芳

字履貞江蘇蘇州人

三月三日



多情常是因花瘦獨坐閒吟晝掩扉好句似從天外得  
春心時在夢中歸

彩筆漫題幽曲怨錦箋難寄辟寒香故人爲我應憔悴  
我爲思君泣夢長

吳徽

字似音浙江桐鄉縣人顏祈之室也

月夜夢歸

假寐承顏到膝前花枝罨月話纏綿正當絮語牽衣際  
白鶴一聲悲遠天

觚賸桐鄉工部雪臞公顏祈之婦吳徽能詩月夜  
夢歸有感云云工部示徽書曰閨閣之詠不嫌婉

弱唐詩所選亦無高老之什看其用筆靈活  
若白鶴一聲悲遠天直可與諸姑相伯仲

徐淑秀

字昭陽詩見國朝選本

淮陰道中

昭陽遺子謫人間曾列龍樓第一班楊柳折來風雨夜  
芙蓉分得水雲顏不知世上無金屋猶說臺前賜玉環  
薄命今生遙集處傷心何地可容閒

商采

字雲衣浙江會稽縣人等軒孫女適同邑諸生  
羅萼青著有花間草綠牕集



子夜四時歌

羅帳碧如烟空牀抱枕眠春風弄楊柳正在綠牕前借  
問遠遊子今行何處邊  
南風五月起荷花滿鏡中輕衫不改翠羞面自然紅鴛  
鴦新失伴回船笑阿儂  
秋月白如練明河流向西夜烏棲不定飛上鳳城啼廻  
文纔織就愁殺寶家妻  
寒風吹朔雪白壁滿天山年少輕離別長征在玉關誰  
將金錯去鏤取兩刀環

春曉曲

美人曉試白羅衣玉鏡臺含明月輝遊子不歸春已半  
繚繞花香入虛幔城南草暖蝴蝶飛一見東風卽腸斷  
春日遊西施山  
扁舟尋勝地載酒艷陽天山色凝眉黛泉聲咽管絃履  
痕留片石舞態散朝烟還共姑蘇月荒臺泣杜鵑

落花詩

授色曾將薄命同惜春情緒怨東風誰憐歌舞當筵盛  
不覺芳華入鏡空海濶天空籌去路雨沉雲散泣深宮  
人間慣聽閒鷓鴣何處雕輪駐錦叢  
走馬廻塘細草齊有情常自逐春啼且教天上看成雪



敢恨人間踏作泥紅板數條村逕杳青烟一片酒旗低  
紛紛蜂蝶還無數翠閣朱樓路已迷

共道韶華上巳佳一年生負踏青鞋四垂忽見雲如幕  
千尺何妨酒似淮人號可憐偏日暮月如無恨自天涯  
金衣百轉含情甚不爲春光善遣排

淡額斜陽欲暮時看花猶是惜歸遲餘香不信全消日  
瘦影重疑未放枝草滿長堤成遠望山圍故國剩相思  
清尊短拍年年事腸斷深閨尚未知

秋懷

薄暮涼生曲院幽海棠紅綻雨初收攜書倦卧休文病

把酒難消平子愁花影半簾留夜月瓊箋一幅賦悲秋  
白雲迷處新亭遠灑淚西風獨倚樓

立秋偶作

月色當階白蛩聲入幕幽羅衣驚乍冷一葉落新秋

擣衣曲

金井梧飛一葉秋依依北斗掛南樓三秋閨閣砧聲動  
八月交河凍不流

昭君怨

羶帳風高朔氣清狼山雪盡暮雲平琵琶總是邊城樂  
不忍還彈出塞聲



王璐卿

字繡君一字仙嶠江蘇通州人適孝廉馬振飛

天姿穎異讀書過目成誦所繪禽魚花鳥極工

間製小詩琴瑟倡酬伉儷極薦著有鴛鴦社錦

香堂諸集繡君有女弟名兆淑字仙琬亦能詩

王士正古夫于亭雜錄宋末浦江吳渭清翁作  
月泉吟社以范石湖春日田園雜興為題中選  
者若干人謝臯羽所評定至今人艷稱之順治  
丁酉余在濟南明湖倡秋柳社南北和者至數  
百人廣陵閨秀李季嫺王璐卿亦有和作後二  
年余至淮南始見之蓋其流傳之速如此同年  
汪鈍翁在蘇州為柳枝詞十二章仿月  
泉例徵詩湖西江南和者亦數百人

答杏颺簡稿

滿囊文賦煥青雯半欲珍藏半欲焚宿有才名驚謝朓

豈非時數忌劉蕢美人日暮懷香草帝子中流倚碧雲

翹首纔知天自濶滄浪歌罷酒初醺

喜杏颺歸舍却和

君歸猶昔日歸遲一寸柔心千里思江月夜棲蝴蝶夢

山花曉壓杜鵑枝詞飛艷雪聯梅日帶篆同心怨草時

今夕西牕重剪燭雲烟共滌別離思

碧霞閣

謾謾松聲數里風深林蒼翠水烟空峩峩樓閣長天外

濃淡山陰遠照中古徑苔花留雀白清溪漁火隔雲紅



梵宮夜半初鐘起靜焙非非萬法同  
試茗

殘漏無眠夜氣寒茶烟數縷露華溥一卮難滌愁滋味  
零亂梨花冷月團

元宵雨中作

冰輪潛彩望難晴火樹猶粧不夜城何事弄珠龍女出  
遶庭翻作雨花聲

絕句

青草河頭花正妍綠莎汀畔水連天輕舟載得春多少  
無數飛紅到槩邊

陳維崧婦人集王綉君通州人馬孝廉之妻也閨房唱和時以小幅行世風調綿整人甚稱之常見其一絕句云云蓋咏舟前落花者筆情波媚與題頗稱云

絕句

春寒日日雨如絲草滿離亭水滿陂寄語東君須着意  
惜花人去未多時

王氏

名安寧浙江長興縣人國學王立甫之女適東

山李一心

女綉雲受髮

無幾垂肩髮已齊學梳雲鬢侍親闈願天憐取孤雛在



裙布還祈換錦衣

自嘆

兩鬢飛蓬懶畫眉  
愁顏脉脉對斜暉  
冰心一點無他事  
祇願泉扃同穴歸

周貞媛

字瑤石江蘇泰州人適施千里著有關關集

刺繡

黃鳥不孤飛綠樹不亂長  
孤飛失所依亂長失所養  
觀茲發長嘆亦復豁幽想  
花間繡觀音針針絕妄想  
我亦任所天空塔一俯仰

讀神傷解哭童幽蘭

春風秋雨幾神傷  
寥落空閨憶曉粧  
亦信有才天也妬  
可憐無語骨猶香  
玉簫聲咽三更淚  
銀燭光搖五夜霜  
碧落黃泉皆是恨  
何須猿淚斷人腸

不知何計解神傷  
幾字詩成百斷腸  
香閣惟懸新總帳  
空箱猶疊舊衣裳  
一燈紅影魂如在  
四壁無聲漏正長  
頻喚真真人不醒  
夜來風雨恨高唐

白並頭蓮

亭亭並立厭濃粧  
枝上新凝六月霜  
素質不登青玉案  
縞衣常伴白頭郎  
比肩如約無私語  
對面相憐有異香



謾道予家留別愛濂溪清淺已成行

詩觀瑤石詩篇妍雅夙推閨房之秀于歸施子千里極有倡子和汝之樂倪永清每向予擊節故探登拙選用誌聯芳云

顏玉

江西人也

垂死別夫

妾年十五許嫁君聞說君情若不聞十七于歸見君面  
春風乍拂心長戀為歡半載奈離何千里江山渺綠波  
未成錦字腸先斷零落胭脂淚更多西江浙江隔一水  
天上銀河亦如此銀河猶有渡橋時奈妾奄奄病將死

傷心未見寧馨育仰負高堂愆莫贖倘蒙垂念舊時情  
有妹長成絃可續君年喜得正英英莫更蹉跎無所成  
無成豈特違親意泉下亡人亦不平要知世事皆前定  
明珠一粒遙相贈非求見物便思人結襦來世于今定

隨園詩話嘉興江浩然幕遊江西于市上得一銀光箋楷書云云後書政可夫君康熙癸酉仲夏垂死妾顏玉斂衽玩此詩蓋有才女子也第所謂政可者不知何人耳

蔣級蘭

字秋佩浙江嘉善縣人適同邑錢以塏著有鮮

潔亭繡餘詩存

錢以塏蔣夫人墓誌銘序畧予元配蔣氏名級蘭字秋佩十齡通經史大義母沈太君奇愛之



庭咏絮風年十九歸余入都卒歲乃歸宜人事太  
學結褵甫三月杖策入都動輒入困宜人脫簪珥  
夫人至孝余貧乏硯田動輒入困宜人脫簪珥  
無幾微見於顏面甲子秋余補教習旅食京華  
戊辰登第始旋里高堂温清能得舅姑歡心暇  
則感物撫時賦長短句自遣得繡餘集若干首  
禁綺自安體素羸怯有渴疾庚午夏轉劇遂不  
起年二十有八四遇康熙初贈孺人再贈於  
人累贈夫人人生子整殤康熙戊戌葬先考妣於  
東雲圩以宜人附於左為之銘曰幼婉順兮嫺  
內則習辛勤兮五夜織帛昧旦兮鳧鴈七余觀  
光兮遊上國代定省兮供職今  
耐子兮先人側卜年世兮安幽宅  
毛蕃繡餘詩存序金閨雲淡蕙閣風輕寫柔思  
於紅箋寄深情於青鏤謝庭柳絮彩藻續紛劉  
氏椒花鴻文璀璨垂大家之合則蘊嬌女之芳  
姿自昔多才於今彌著則有彭城少婦樂陵淑  
姬秀外惠中含華隱耀嫺若華之姆教範史繩  
經習叔皮之門風敦詩說禮艷神針於刺鳳蔚

彩筆於雕龍繡陌春嬌爰舒金線銀缸夜暖聿  
展桑根考屬國之五言稽栢梁之七字裝凝玳  
瑁帙散蒲萄遠及同半益多密詠月光縹緲對  
虛牖以長吟花影參差憑曲欄而遣興遂以吹  
簫之暇參訂元音還當鼓瑟之餘裁成新曲紫  
雲韶麗晨露清涼沈三已遜英華柳七更翰香  
豔既而士衡入洛司馬遊梁千里長征悵關山  
之迢遞三年作客感時序之蕭寥詩寄杜羔書  
貽秦淑風神繼綵情致纏綿金猊之爐未寒武  
夷之莽方熟花箋五色並清照而爭妍錦字千  
行溯若蘭以競巧香奩標其雋逸玉臺揭其清  
新乃燕山之駕甫停而閨苑之招旋至臙脂零  
落金粉銷殘簾外花香絕少染衣之秀簷前梅  
藥曾無點額之前人奉倩所以神傷安仁為之心  
悼集豈難覲窗前之句光景如新檢芙蓉帳底之  
篇音容難覲偶因管蒯辱托葭莩拔勿婦之新  
詞擷蘭紉蕙覽淑人之形管琢玉追金君子有  
懷應續招魂之旨密親長慟還成哀逝之文謬  
附丹鉛用彰才調



秋閨

親檢綾綃爲製衣剪刀欲舉更遲遲夢中面目雖依舊  
別後腰圍尙未知北鴈未傳君旅恨西風長動妾邊思  
分離曾記梅花發可奈丹楓滿路岐

秋夜悼錢湘雲和祖姑曹夫人韻

玉折蘭摧恨不禁虛窗寂寂賸殘衾煙迷芳草花光冷  
露滴疎桐月影沉六憶裁成離緒邈三生難覓舊情深  
茱萸匣鎖長惆悵回首當年繫我心

秋思

殘日籠疎竹新霜糝玉堦夢魂隨獨鴈夜夜到天涯

病起

紗窗落日影重重懶把菱花照病容成陣落紅春已去  
且將心事托青松

寄姊

靜掩菱花懶畫眉每思同氣淚沾衣室遐心邇尋常事  
何日牽裾話別離

不寐

雲散晴空雨意收碧梧弄影月光浮不知玉笛吹何處  
引起深閨種種愁



摘芳集卷之二十三目錄  
才媛詩

古歛訥菴汪啟淑選

席淑媛 三首

堵霞 五首

張智殊 一首

葛覃 七首

荆六娘 三首

徐氏 三首

碩塔哈 三首

徐淑 二首

方紫霄 一首

謝瑛 一首

姚霞齡 九首

蕭氏 一首

張季琬 一首

李淑 一首

陳結璘 六首

黃珮 五首

王芝玉 一首

朱達 十首

周淑媛 一首

余氏 一首

蘇眉秀 二首

程氏 一首

繆鴻莊 一首

尹氏 二首



姚世鑑 一首

謝氏 八首

擷芳集卷之二十三

古歛訥菴汪啟淑選

席淑媛

江蘇長洲縣東山人鄭學山之室也

閨怨

康熙丙寅都門傳題韻限溪西雞齊啼內用  
一二三四五六七八九十百千萬丈尺雙半  
字等

愁絲十丈繞雙溪二六峯前兩雁西  
半夜幽情千里月  
五更殘夢一聲雞  
八行尺素三江遠  
七月清砧萬戶齊  
百事縈心腸九曲非關四壁有蛩啼

題馬上琵琶圖



少小從征天一涯誰憐顏色勝於花春風馬上琵琶慣  
不解宮粧學內家

詠雞冠花

名喚雞冠賽鳳冠一般紅紫不凋殘庭前獨自誇秋色  
還與黃花帶笑看

七十二峯足徵集淑媛席文淵之女適吳門郭學  
山敏慧絕倫矢口成章髫年隨母氏翁夫人玩雞  
冠花命之賦卽吟云  
云時有女神童之稱

堵霞

字巖如號綺齋又號蓉湖女士江蘇武進縣人  
進士伊令之女適同邑諸生吳元音著有三到

堂稿含烟閣詩

圖繪寶鑑堵霞字綺齋號蓉湖女士梁溪進士  
伊令堵公女同邑庠生吳元音室善讀父書博  
通經史游情繪事凡作花木禽魚蟬蛭疏菓之  
類不用落墨并無粉本隨意點染皆臻神妙喜  
吟咏兼工蠅頭小楷遇得意輒信筆題跋其上  
一時求詩索畫者雜沓填閭巷殆無虛刻遂安  
毛鶴舫先生評云綺齋之詩清婉韶秀高出晚  
唐有烟霞想無脂粉氣畫法宋人深造徐寅沒  
骨化境而艷麗閒雅勝之至其寫生入微處翻  
翩韻致出自天然非優柔軟媚鈎描形似者比  
真近代所罕觀傳世之珍玩不意于閨閣中得  
之宜乎四方推重爲第一也所著有三到堂稿  
詩最分編含烟  
閣詩詞行世  
倪永清評其詩曰邗江壇坫愧殺宗工隋苑珮  
環偶來仙子以或泣或歌之筆運可風可雅之  
才庭前柳絮壓道韞以爭奇指上花紋駕天孫  
而奪巧鹿車共挽鴻案相將間以腕底烟雲寫



彼胸中邱壑神飛色舞骨峭心靈舉國叱為名家同袍指作韻事燕閣芳型久已傳諸海內龍宮明月不妨散落人間作者固斷腸而吟讀者當改容而立

渡江

行帆懸夕照客路鳥邊賒霧散江初淨烟深日未斜鷗閒眠細草燕舞蹴飛花回首前朝水依然走白沙

春日感懷

蘸甲紅螺懶更傳小樓東去柳如烟還家只有三更夢伏枕何堪二月天閒展畫圖花不語自吟詩句鳥應憐故園女伴空相憶春樹春雲一惘然

春日病起次陳夫人韻

怪殺春光不去何畫船簫鼓又經過藥爐茶竈相依慣綠慘紅愁領略多家國別來憑蝶夢心魂病後寄蜂窠古逃死者寄魂魄于蜂窠鬼尋不見篆烟裊裊紗窗靜閒接荒籬白鷺衰

題白華樓二首

白華樓上晚雲開引得新涼次第來聞道樓中人乍起又橫椽筆補南陔

花間有客欲登樓却說慈雲在上頭最是孝思人不見薰風吹遍古揚州

張智殊

浙江仁和縣人張岐然之女也



秋夜

月夜皎無塵閒庭碧草生山風吹落葉於此作秋聲

葛覃

字文娥江蘇長洲縣東山人著有還讀齋合稿

吳定璋七十二峯足徵集先繼妣葛孺人為葛震甫先生從孫女名覃字文娥素聞家學性嗜吟咏與陸鳩峯女覺菴金峴亭妻陳啟淑家柳亭二女雪媚水香相唱和詩筒來往靡間寒暑晚年虔奉竺典覺菴繪五十三叅圖為贈孺人晨起焚香頂禮誦大悲神呪四十九遍家人進飲食不輟也著有還讀齋合稿二卷

賦得歸雁喜青天

歸雁喜青天排行去浩然凌霄投絕塞帶月過寒川不

染春朝霧還衝野渡烟樓頭擡望眼白羽翠雲邊

同女道士成姑遊岱心

誰道春將晚岱心時正芳櫻桃紅壓樹楊柳綠成行吹面松風細迎人蝶翅香不嫌樵徑滑携手上高岡

靈巖懷古

宛轉籃輿上翠峯浮圖鈴鐸語春風琴臺韻冷埋芳草脂井香消亂活東霸主有心存越祀美人何意沼吳宮興衰代謝尋常事遮莫啼鴉怨落紅

夏日偶成

不信人間夏日長園林自有好風光桐陰密密青遮屋



鳳竹娟娟翠繞廊着雨新荷逞艷冶穿簾乳燕學飛揚  
羅衣紈扇常來往宜酒宜詩是此鄉

秋日懷兄客西寧

瑟瑟西風裏長空斷雁飛鵲鴿原上望無處寄當歸

遣興

燕語鶯啼午夢驚篆烟裊裊繞簾輕病餘不耐吟芳草  
却展紅箋記藥名

寄懷雪嶺冰香兩姪女

金風習習透窻紗秋老蒹葭一水遐安得長房能縮地  
鈎簾同看海棠花

荆六娘

江蘇丹陽縣人適虞拊石府尹鳴球早卒

永訣詩

夜深風驟響庭槐花澀殘燈半未開寂寂蘭房人去後  
空餘月色爲君來

淚染羅衾欲盡時憐君還復惜君癡寒梅零落春原在  
紅嫩桃花又一枝

風簾猶自響金鈎環佩無聲月滿樓鈿盒傷心休更啟  
對君敲碎玉搔頭

西清散記荆六娘者虞拊石妻也温慧能詩自恨  
不得爲才子得爲才子婦卽貧且天如飴年廿一



歸拊石拊石有異才行第二六娘自幸屢劫修乃  
今配二郎失二郎得仙弗願也正月嫁三月病六  
月而死死之夕賦詩八首自為序與二郎別誦其  
詩者為拊石恨余曰六娘不能享才子福耳六娘  
如雙卿即不死矣然雙卿不願不死則願為六娘  
也拊石讀雙卿詞夜半望西而拜言平生願一見  
趙閻叔今復得雙卿不見之虛  
此生矣六娘永訣詩取其三云

徐氏

字幼芬江蘇揚州人工部徐葆初女適孝廉李

淦與叔姑季靜嫵夫人迭有唱和早卒

王阮亭讀徐幼芬遺詩兼寄李季子詩自來學  
得謝公某博士風流幼婦詞未免有情看不得  
橋南荀令  
斷腸詩

春日

日暖春光媚花香燕子歸啣泥看未厭又見蝶雙飛

宮怨

小苑黃鶯弄巧言春深碧草暗長門終朝兀坐愁心亂

怕見傍人繡綵鴛

病起戴僧帽觀雪

厭厭病質下高樓幸有瓊瑤可破愁對鏡自憐同野衲

粧成撇却玉搔頭

碩塔哈

滿洲人原譯色他哈

和白曉月題壁韻

有序



右怨別詩妾姊白曉月氏作也初姊距妾家本  
數武而近以故得朝夕會且渠凡有感觸輒成  
詩詩輒示妾妾故知其才若貌為一時巾幗冠  
雖古昔班謝輩弗之過歲戊戌姊以中秋對月  
作見示且索和中有邊塞征人意深閨思婦情  
妾亦口號成律有物隨秋漸老人與月同孤句  
越明年渠良人遠戍去今年夏妾夫子亦從軍  
徂閩蘭房寂寞錦帳生寒秋月春花徒伴一窻  
蕭瑟曩者中秋對月句斯其識歎嗟乎通於才  
而窮於命豐於貌而嗇於時者古今來指不勝  
屈妾才若貌固遠弗逮姊氏萬一其時命不偶  
未之稍稍上下今讀渠壁間韻勿禁泣數行下  
因嗚咽握管次  
原韻成三絕句

帳冷衾寒怨阿誰柳烟花雨總成悲怕看春草當窻綠  
別後珠簾盡日垂

塞外馬嘶青海夜閨中人動白頭悲可憐別後庭前柳

一樣黃昏帶月垂

領略春光今共誰杜鵑聲裏最堪悲香閨夢繞沙場月  
曾見征人亦淚垂

徐淑

字景淑江蘇吳縣人贈太常高立菴配也著有

三餘倡和詩

過蓮池僧舍同湘蘋大姆

武林閒寓日扶杖叩禪扉地僻忘塵俗心閒略是非雲

山天外現花雨靜中飛入世渾如夢浮名漸息機

齊兒改授臨邑令聞已之官



天涯遊子去依依清白家聲願不違小邑榛蕪人戶少  
寒林風雨瑟音希按圖如舊連青岱攬轡從新出紫微  
聞道少陵高唱在嵒山湖畔有光輝

方紫霄

浙江鄞縣人史某之室也詩見天童寺志

登奎光樓

長日登樓對太白山光射人娛朝夕我今身入青山中  
竹樹陰森蒼苔積萬壑奔流赴一溪清關橋畔水聲齊  
層巒疊嶂不可數怪石懸崖翻欲題復有玲瓏起天半  
微陰籠石迷昏旦麗日雖舒崑上光明霞難向窟中燦

靜坐深山息足非攜來清景愜芳菲故晴春花弄色  
冉冉白雲石作衣山幽人盡尋芳去誰得山情絕世慮

回首樓窗一片雲

適甬東史門

此中香刹歸何處

謝瑛

字玉英江蘇無錫縣人東平刺史徐聲復之室  
也著有壽藤軒集

送外北上

握手臨行話別時叮嚀腸斷淚如絲從今憑仗三更夢  
飛繞君前不暫離

陳維崧婦人集武進徐太守名可先夫人謝玉英  
名瑛詩名籍甚性簡遠蕭勝不嬰世務太守之官



後夫人盡斥其橐中數千金買青山庄居之時於  
橋上憑欄小立吟哦竟日其風味如此著有博依  
小草近留心禪理  
并詩亦不多作云

姚霞齡

浙江錢塘縣人孫懋觀爽之室也著有晚雲樓

遺稿

病劇留別夫子

憶昔身當垂髮時堂前二老憐嬌癡朝日牕間閒握管  
晚雲樓上學哦詩長成嫁作君家婦君志四方難聚首  
敢從霧裏怨芙蓉常覺風前恨楊柳眠沙逐浪雙鴛鴦  
金瓦無情翠羽傷君悲莫使冰微裂鸞膠努力還求凰  
身後身前思欲絕母亡穉女誰攜挈含酸已矣向泉臺  
白草黃沙淚凝血

病起

幾日荒園不暫遊閒行幽草綠初稠鐘聲遠近烟中寺  
樹影微茫雨外樓卧病心情猶帶嬾殘春天氣正多愁  
畫梁燕語渾無緒故向簷前絮未休

秋夜

花影籠階月影低流螢明滅樹東西沉沉遠漏聽還歇  
淡淡宵雲望欲迷別恨難憑秋雁寄離情常遣夜鳥啼  
夢神今日呼無應又使愁魂怨曉鷄



當歸花四首

朝來輕露濕紅粧弱態臨風又欲颺最是命名多感觸  
喚他羈客頓思鄉

弱質柔姿怯曉風晨妝理罷理詩筒蠻牋半爲模君態  
只恐窮愁句未工

容嬌態弱兩芳華艷李穠桃未足誇最是兒曹初解韻  
便將拙句襲名花

徘徊庭砌久凝眸花力常兼風力柔却是美人春病後  
倚簾無語但垂頭

哭母

颯颯秋林送曉悲瞳矐日影閃靈旗傷心更洒西風淚  
淚盡無由見母儀

天竹子

絳質凌空別樣奇經霜偏結歲寒姿若教植向隋宮裏  
遮莫珊瑚綴綠枝

蕭氏

江蘇山陽縣人詩見冒丹書婦人集補

絕句

花谿紅亂燕雙飛錦水香泥春獨歸爲憶金釵樓上夜  
琵琶度月下簾幃



張季琬

字宛玉別號月鹿侍史福建閩縣人張洪女適

朱文炳

題自畫蛺蝶

蘧蘧飛出宋東家春去何心夢落花描得滕王新粉本

小窻只當寫南華

香草齋詩話張季琬字宛玉別號月鹿侍史閩縣人新安縣河廳張洪之女適江寧府叅軍朱文炳

能詩尤工繪事自題蛺蝶圖云云

李淑

字玉山浙江錢塘縣人

題畫梅為姚母壽

年年籬菊綻清秋黃鵠長歌未白頭此日稱觴冬候早

梅花先逗暗香幽

陳結璘

字寶月又字蘭修江蘇常熟縣人孝廉瞿曇谷

元錫配也善丹青工絲竹著有峻喜堂集藕花

莊集

王烟客藕花莊集序夫德藝相宜要歸至道必研深入微乃臻具美即圭璋特達之彥猶憂憂乎難言之何況閨閣筭禕者流茲虞山瞿太君陳夫人者以道蘊林下之風邁少君高世之行宏覽博物含英咀華固已伉儷倡和嚶鳴悅響矣旁及繪事又能力追宋元出入四大家一一



亂真而所著詩草深得三百篇之遺意有鬚眉才子之所不能道者昔趙文敏公文章書畫震耀古今與管夫人酬贈討論正堪對壘夫人之追隨唱和固足媲美若夫原本忠愛抒發性情則曹大家且未能望其項背惜稿多散失僅存什之三四壽明翰檢哀集而藏弄之奉爲世寶於瞿氏文章忠孝之外又傳不朽盛事其永爲子孫天球宏璧者寧有既乎

國繪寶鑑陳結璘字寶月常熟人孝廉瞿伯申配蘭心蕙質畫工山水詩有少君風味

田園雜興四首

新晴緩屐過邨西  
菜麥同青水拍堤  
放鴨舩歸香雪滿  
聽鶯橋斷麴塵迷  
滄桑任老花三徑  
烽火難更雨一犁  
何處芳菲堪挂眼  
十年魂夢武陵溪

嶺外輕雷暑氣蒸  
茅檐翁媪話年登  
危陞雨過難容屐

狹港船歸喚起罾  
虹影蘸湖雲自斂  
烟光鎖樹翠猶凝

休耘荷鋪橋頭立  
晚市爭看販早菱

秋日郊墟喜漸涼  
稻花阡陌散晴香  
爭梨鳥雀喧斜日

踏藕兒童鬧晚塘  
老樹在門常掃葉  
好山當戶故低牆

悠然獨坐南窻月  
早桂清芬白苧裳

雲重風高暮雪天  
冰條朶朶漸裝綿  
蹇驢尙怯霜橋跡

羸馬偏驕紫塞鞭  
茶沸竹窻挑宿火  
香深松戶裊寒烟

悠然更起山陰興  
欲借林逋放鶴舩

雨過

雨過深庭草壓扉  
霜苞初拆翠梢肥  
鶯喉咽曉圓猶滑



蝶翅翻晴墮又飛應怯露涼添素縠最宜花氣潤金徽  
朝來麥隴看新浪小婦溪頭叫浣衣

咏冰花

化工着意點衰叢開落寒山萬水中謝豹斷魂啼夜月  
春駒無夢採深紅玲瓏巧結愁朝旭皓白輕粧簇曉風  
未比隋宮勞剪刻依稀幾朶玉池東

黃珮

字如芳浙江錢塘縣人能詩工小楷適陳子寶  
維著有詩稿一冊卒之前數日以為非婦人事  
盡付丙丁所選蓋附見于木菴之牆東雜鈔也

王悼哀黃少君詩聽從母教早依庭能博慈顏  
眼倍青今日衣裳猶在挂承歡那復見歸寧佳  
偶天生自不羣恰看新婦配參軍月明正在當  
圓夜惱被蒼桐送白雲待曉每聽雞唱無疑粧  
猶自影模糊而今冷落堂前路更有誰來問舅  
姑臨池愛學衛夫人倡和詩成亦有神寄語聞  
中同調侶莫將珠玉委埃塵知已天涯莫浪猜  
近傳閨閣解憐才芸香夢斷紫雲杳悵望仙姝  
去不來

秋海棠

參差媚影倚東牆花比人顏誰更芳深夜月明秋色靜  
輸他白露洗紅妝

寶維命咏金鯉

何事托身淺水中金鱗掩映綠波紅只緣未遇龍門浪



掉尾難乘天際風

重陽寄懷寶維

重陽自是最良辰  
滿徑黃花欲醉人  
懶向籬前還獨坐  
把杯時復憶陳遵

題王慎旃按劍圖

壯心獨倚白雲天  
霜刃磨來已十年  
銀漢若教占氣象  
光芒直射斗牛邊  
丹青妙手寫天真  
橫佩銀鍔最有神  
莫笑酒酣思斫地  
世間多有不平人

王芝玉

江蘇真州人

題青州驛壁

滿淚辭親北路行  
可憐誰識意中情  
強將紅粉隨車騎  
腸斷荒雞向曉聲

朱達

字虔齋號海昌女史浙江海鹽縣人適陳使君

克鉉著有慈雲閣詩存

仁齋陳克鉉慈雲閣詩存序恭人系出紫陽爲  
花溪望族先外母祝太安人工詩文其吟咏與  
素賞樓齊名恭人之能詩家學然也性慈惠明  
于事體予任海陵簿書鹽筴旦夕旁午往往佐  
予不逮甲戌乙亥海壖饑上官命予典賑恤啼  
號甚迫收發有期予甚難之恭人曰此既不能



如趙清獻之完城寓賑何獨無范堯夫之膽略乎予計遂決迨子遷官豫晉其相助爲理類若此辛巳姚暹渠水漲溢衝決解家黑龍東禁五龍長樂等處隄堰恭人深爲子慮日夜心悸以至成疾壬午卒于官舍享年五十年所居平甘淡泊喜習靜長齋繡佛于茲已二十年所作詩成輒毀之子欲體恭人內言不出之意擬盡焚之伯母董太恭人叱曰爾婦一生懿行將與紫石鐫文俱彰爾欲沒之胡寧忍矣鉉受命撫拾叢殘編次成帙以俟操彤管者進退之也

昭君圖

茜袖啼初溼冰絃怨欲死畫圖去渺茫輦路空離企翠竹潤偏無蛾眉長莫恃休咎丹青人妾命原如此

庭前建蘭花發甚茂次東坡咏海棠韻

辛夷楣畔葯房複鏡檻墀除迥幽獨使君高致慕王維

手種魚魴消塵俗不須爲佩託三湘但覺無言似空谷黃磁古樸照青尊綺石玲瓏傍華屋清露微馨紫滿莖光風徐汜紅生肉每爲羅含叢愈多自對元疇香更足讀罷南華吟閣閒日捲蝦簾擷清淑勞勞役已不爲眸悠悠養已寧爲腹細根縹帶照我前別有佳人倚修竹勗君亦有竟體芳風儀一送梁王目石蘭芷蕙俱孤標未肯堂前爭洛蜀有榮何必羨青蕭有翼還須比黃鵠鄙意常媿霍定錢高懷終入尼山曲頗憶楊夔擇祿言芳荃止合清泉觸

臨春閣以此題課兒女輩并作一首示之



陳王高閣臨江起復道交窻連結綺當年吟咏擅才華  
歌聲夜徹千門裏敵國軍營木柶流臨春詩酒未曾休  
橫江旌甲如飛渡王氣鍾山一旦收珠簾寶帳寒無影  
璧月瓊枝夜夜冷雲散風流學士亡後庭花落朱門靜  
勝地消沉喚奈何遺基依舊接江波春風桃李無窮恨  
夜月秦淮一曲歌

海棠

花霧濛濛春未老蝦須簾捲明芳草東風用意染胭脂  
西府名葩開更早數點欹枝猩血紅止宜著雨不宜風  
獨來清賞燒燈後扶起濃粧淺睡中濯錦江頭愁最擅  
碧雞坊裏驚難見鬢亂釵橫不自持華清呼起羞嬌面  
吸盡紅雲只恨遲神仙風格立芳時漫山粗俗嫌桃李  
爲愛清標折一枝

春日閑居

春光來海角淑氣滿池頭竹暗啼鳩路花明乳燕樓景  
供鉛筆畫詩愧錦囊收深院無人處爐烟一縷抽

樓上

夜深殊不寐寒色望中遙山月驚棲鵲天風落怒潮晴  
烟籠榭榭湛露滴芭蕉半捲湘簾起爐香細細飄

蝶



春駒艷艷下芳條亦逐花籠過畫橋東閣簾開通粉翅  
南園草綠舞纖腰桓伊笛裏風愁起庾信籬邊雨怨飄  
翠紺丁香渾不定莊生魂斷竟難招

運城官舍

花落青苔上湘簾不上鈎前山一夜雨溪水枕城流

寄妹二首

相思相望隔重城鴈盡天涯信不聞閒疊吟箋收錦篋  
好將清思寄南雲

每憑燈蕊卜平安千里音書欲寄難悵望如眉城上月  
別君二十四回殘

周淑媛

字又洲江蘇泰州人詩見

國朝詩選

元日哭先大人

一夜思親淚天明又復收恐傷慈母意暗向枕邊流

余氏

三韓余魯山室著有蘭馨集

江上

八月清江上西風急暮秋鳧鷖驕過客牛馬散爲邱但  
得宦情冷重爲故國謀越山雲外好我欲問歸舟

蘇眉秀



字芳媛里次無考

孫貞媛詩

戎深骨肉慘無存  
撫字嬌雛賴嫗恩  
節傲羅敷甘自殞  
禪叅琴操敢同論  
風清月白迎仙珮  
草蔓烟荒訪墓門  
剗盡雷塘田萬頃  
願移香蛻與招魂

次韻題明妃圖

幽閨深宮怨已稠  
披圖况是別離秋  
但能永斷邊城釁  
妾命甘捐塞外頭

程氏

名德曜江蘇吳縣人  
適同邑沈香祖居常荆釵

裙布屏絕脂粉能耐貧  
苦香祖好書史不治生  
產晨夕所需皆仰德  
曜針黹繡績宗族鄉黨罔  
不稱賢著有學吟草

湘妃怨

鑾輅迢遙不可尋  
二妃南渡九江深  
青楓蕭颯巴陵道  
斑竹嬋娟帝子心  
何處揚靈聞太息  
有時鼓瑟發哀音  
蒼梧遺恨無人識  
湘水滔滔自古今

繆鴻莊

詩見谷音傳響

次韻題明妃圖



塞草連天入望稠  
琵琶馬上怨清秋  
漢家飛將沙場死  
何惜區區一粉頭

尹氏

江蘇蘇州人詩見詩觀三集

題泗州之鮑集店壁

并序

妾吳門士人女也幼嫻詩禮曾歌柳絮因風長  
奉蘋蘩豈意桃花逐水母也天只但想乘龍夫  
也不良誰知煮鶴既入宮而被妬貌悔人知總  
閉戶而自傷憐誰我見茲者隨夫薄宦棄母遐  
征北望黃沙聞道雄關百二西連白草愁瞻玉  
塞三千金屋誰嬌長門有怨馬上琵琶同昭君  
之遠適扇頭鸞鳳歎班氏之棄捐浪說多情祇  
應薄命偶因旅宿聊賦愁懷敢寄恨於白頭豈  
借辭於紅葉王子花朝日薄命女尹氏題

綠楊深處暫停驂  
西望關山正蔚藍  
蝴蝶不知人去恨  
還隨春色到江南

雕鞍西去正深春  
欸欸鶯歌聽不真  
寄話故園諸女伴  
今年花柳倍愁人

姚世鑑

字金心浙江歸安縣人詩人姚世鈺胞妹適長  
興王豫

春感

東風庭院林鶯語  
斜日簾櫳海燕飛  
九十春光今已半  
行人到此也應歸



卧病

卧病逾時歲又新  
衡門兩版絕囂塵  
垂簾怕放東風入  
春到貧家不當春

謝氏

字麗娟江蘇上海縣人

高士吳懋謙滬上秋懷集凡例謝氏麗娟從未聞其詩各適余輩坐旅次有人叩戶捧函而進詢之乃謝家僮也及開函別無一札止和原韻八首使者口述欲入集中且云閨闈防範索歸原稿湘士匆匆錄之亦不暇考其里閭然幽思俊句春容大雅望而知為深閨淑媛矣

和吳六益先生秋懷韻

落紅曲逕倚窗看  
菊蕊英英進夕餐  
弱態不能消永晝

低眉常自畏輕寒  
芙蓉香細珠簾捲  
翡翠風清綺閣寬  
閒傍粧臺一眺望  
小亭疎雨竹千竿

淡淡涼風樹影微  
半生心事尺書稀  
水亭紈扇歌新曲  
秋院琵琶試舞衣  
香煖金鑪銀燭冷  
聲殘杜宇落花飛  
莫教明月依人照  
惆悵蕭郎醉不歸

丙史兵戈往事遙  
白蘋紅蓼雨蕭蕭  
珠袍一死功難盡  
玉匣雙龍氣未銷  
八月孤鴻衝舊壘  
千峯落葉散秋潮  
西風夜夜孤城外  
我亦淒清賦九招

袁崧墓

愀然王謝舊高堂  
錦石蘋花古六蒼  
畫檻貂裘湘北酒  
層臺翠袖嶺南香  
半畦衰草依明月  
一帶寒蟄冷夕陽



聞說當年歌舞地倚欄凝望浦雲長

樂壽堂

登眺還乘丹鳳梯岩峩飛閣與雲齊長空白雁西風急

隔岸青蘿落日低蛛網封梁苔蘚蝕碑文濕露野鳥啼

相傳聖母凌空去玉珮珠衣過浦西

丹鳳樓

斜日疎籬繞澗松朗公洗鉢可降龍龍葱碧瓦秋深月

縹緲旛幢夜半鐘雨暗荒蛩經散後燈寒酒醒夢來重

何時自禮空王座笑指蓮花曉露封

青蓮菴

季重風流不可尋馳驅京洛曉霜侵濤箋九疊年年恨

銀蒜雙垂一夜夜心白鷺倦飛江畔雨紅梨偷放暮秋陰

閨中每讀陽春調漫寫新詩仔細吟

汀蘆岸葦暗城東子夜霜華靄碧空眉黛淺深紅燭下

墨痕狼籍練裙中梁間雪色歌難緩指下泉聲聽不窮

誰解深閨偏學步當年道韞有家風



擷芳集卷之二十四目錄

才媛詩

古歛訥莽汪啟淑選

宋凌雲 四首

汪氏 十首

冒德娟 五首

張氏 一首

戴文英 四首

戴文蓮 二首

劉煥 四首

趙嗣徽 一首

卓璵 二首

沈淑孫 一首

方青 二首

汪燕淑 四首

李氏 九首

吳景桓 一首

章氏 一首

蘇世璋 十一首

陳鳳 一首

朱湘芷 一首

秦沅 二首

吳受竹 五首

金宣哲 八首

林氏 一首

顧若憲 三首



擷芳集卷之二十四

古歎訥莽汪啟淑選

宋凌雲

字逸仙江蘇長洲縣人適同邑李博

國朝詩別裁集晉銓部宋南園先生嘗向余言孫女弱齡卽喜誦吾子詩收臺側時手一編也今將四十年其言如昨而逸仙已歸泉壤矣俯仰三世可勝慨然

挽孫烈女

山川靈氣鍾巾幗雲鬢月貌心匪石一縷紅絲志不移  
生前何必曾相識傷哉吾鄉孫烈女素嫻姆訓深閨處  
書禮雍容出大家淑慎端莊寡言語未賦天桃失所天



斷腸血淚灑窮泉上堂嗚咽不成聲哀挽萱椿乞見憐  
兒身命薄因至此于歸有期夫忽死餘生甘賦柏舟篇  
衰經奔喪以身委言訖垂頭掩面啼高堂驚惋亦歔歔  
勉將大義諭嬌女情則如斯禮却非幼年掌上相憐汝  
長爲辛勤覓佳侶雖云許字未云歸何得遽作過情舉  
迢迢歲月守空幃况值芳菲及笄時在室宜遵父母命  
他年望汝作門楣烈女聞言心暗傷迴身掩淚入閨房  
雙親旣不從兒志曷若捐軀歸冥鄉訂盟雖是未同衾  
矢死靡他誓此心先前永斷光鴻案同穴還依連理林  
夫去泉臺猶未久毅然從之惟恐後半幅羅巾委玉顏

烈氣千秋長不朽哀哀堂上泣慈烏九原何處覓嬌雛  
內外姻親悲且敬道旁聞者咸嗟吁人生百年瞬息耳  
烈女風期渺難企莫遣巫陽爲返魂任躡白雲渡湘水

偶成

天外魚書絕征人豈念家可憐小兒女夜夜看燈花

憶父

吳樹燕雲斷尺書迢迢兩地恨何如夢魂不憚長安遠  
幾度春風問起居

欲歸未得悵空囊兒女相思淚數行苦憶寢門雙白鬢  
朝朝扶杖倚間望



汪氏

字韞玉號蘭雪浙江歸安縣人適金若川早卒

著有蘭雪詩鈔

汪淪原蘭雪詩人小傳詩人姓汪氏字韞玉別  
 字蘭雪世居竹林蓋閩秀而兼林下風者也自  
 幼端莊淑慎內言不出事父母雞鳴雜佩以孝  
 謹聞母歿事嚴父更極誠敬撫諸弟妹誨養備  
 至中樞中有鬚眉之日年十八歸甌西金若川  
 世講為介婦金故望族簪纓閩閩翟芾魚軒一  
 堂之上輝煌焜耀詩人處之恬如也奉尊嫜羹  
 湯滫醢善得歡心妯娌之間肅肅雍雍從無間  
 言至於琴瑟在御莫不靜好鹿車鴻駕風斯近  
 焉少聰穎性耽翰墨從季父學詩兩月即能吟  
 咏其為詩也雅不喜香奩體吮墨含毫字字俱  
 從靈府中流出而一種蘭芬桂馥之氣撲人眉  
 宇間談風雅者方以左嬌鮑妹擬之而詩人幽  
 閒貞靜居聽月樓中嶺雲自悅從不敢輕出片

紙以夸耀於人觀集中春晝詩云多愁怕見  
 東風面一任花飛不捲簾其風致可想矣

過凝香閣看菊

百卉向秋凋爾獨經霜媚造物本無私特與高人置當  
 軒闥小徑冷艷襲烟翠瘦立淡無言臨風想高寄主人  
 愛客來煮茗助幽致香氣日夕佳徘徊得真意彭澤去  
 已久風流此可繼何庸酌甘泉餐英已先醉

采蓮曲

霞光欲斂湖光綠紅藕風微散芳馥木蘭舟裏石榴裙  
 櫂歌聲出橫塘曲就中有女殊娟娟陸離羽珮珍珠鈿  
 欲采不采嬌無力停橈暗羨鴛鴦眠鴛鴦比翼空凝佇



翠袖臨波淡容與淚珠不共露珠晞儂心較似蓮心苦  
苦心脈脈有誰知滿湖涼月殢相思彩雲天遠何由到  
妾貌如花能幾時

題攜琴看鶴圖

君不見雕鞍駿馬五陵游臂鷹挾彈佩吳鉤又不見十  
千沽酒蘭陵市玉管金壘鬪華侈人生行樂須及時免  
俗未能聊復爾名士心期獨不然逍遙物外得林泉栗  
里之琴何寂寂西山之鶴何翩翩琴鶴優游少塵霧修  
竹幾竿松幾樹竹露松風對異書筌蹄妙理閒中悟浮  
生夢覺卽神仙披圖髣髴丹邱路

月上

月上碧天淨微雲淡不收超超千象外皎皎一輪秋照  
地雪疑積臨波金欲流良宵意不盡千里共悠悠

聞蛩

秋闔憐夜永悽惻動鳴蟲已苦當窻月還驚落葉風似  
愁吟不定如語絮難終無限關山意聽來枕畔同

柳絮

楊柳春情孰主張輕風吹落絮飄颺漫空欲混白雲影  
到地却沾紅雨香漠漠溪流悲浪逐茫茫鴻爪恨天長  
一生只有詩材好付與東山窈窕娘



送外之蘭陵

綠遍郊原草正肥垂楊千縷思依依已憐客去春兼去  
那更帆飛花又飛玉笛尋常吹落月疎林容易下斜暉  
勸君別後休吟苦白雪天涯和者稀

春晝

春晝陰陰繡懶拈鷓鴣聲裏雨廉纖多愁怕見東風面  
一任花飛不捲簾

秋日寄外

送君別浦綠初肥又見山城木葉稀偏是樓高先得鴈  
故書人字向南飛

紗窗如雪月華明刀剪方閑已二更才欲天涯尋舊夢  
鄰家又急搗衣聲

冒德娟

字燕婉江蘇如臯縣人冒無譽之女也

詩觀子與無譽誼切葭苕稔知其閨閣貞靜勤  
敏而書史獨嫻左芬謝蘊自爾一往風秀採其  
數章允為  
林下傳誦

秋夜

飄來紅葉忽成秋又見雙星兩地愁階下細蟲喧不歇  
簷前紫燕語難留空庭砧杵催長夜遠寺鐘魚逼戍樓  
薄醉欲眠猶未得綺窗遙望月如鉤



風箏

積雨初晴天氣清  
小姑含笑理風箏  
擡頭忽見雙飛燕  
似有參差不語情

夏日

芭蕉深綠映疎窻  
高柳蟬鳴晝景長  
悶捲珠簾看日影  
鴛鴦相并立池塘

春閨

風動簾櫳春晝長  
鶯聲催起整殘妝  
獨行亭畔拈花朵  
不覺羅衣怯晚涼

曉起

曉來初起對窻紗  
日上珠簾弄影斜  
風動高枝黃鳥囀  
聲聲啼向碧桃花

張氏

山東蒙陰縣人詩人張思孺之女也思孺客死  
曲阜女哀毀骨立尋亦夭卒

抒懷

零針斷線總前緣  
暫把閒書破晝眠  
翠竹常留終歲色  
嬌花且種逐時妍  
未題詩句紅牆上  
欲毀妝梳妬水邊  
曲几焚香心字小  
夜來新月故娟娟

戴文英



字雪林江蘇江寧縣人也

暮春晚霽

雨過濤聲急青山帶落霞遠觀歸陣鳥近聽隔林蛙細  
細階前草盈盈陌上花東山初吐月村酒不須賒

聞鴈和辰東兄韻

皎皎雙星夜未央孤鴻嘹唳過迴廊差池羽帶吳江雨  
哽咽聲悲冀北霜一榻清風驚旅夢半窗寒月憶家鄉  
有書莫達邊城客目送天涯更斷腸

春日苦雨

連朝陰雨妬春光閣筆當風欲斷腸最是夜闌人靜後

聲聲偏在讀書牀

秋夜

一簾秋月晚風涼砧杵聲隨玉漏長靜裏謾題愁絕句  
怕聞蟋蟀近琴牀

戴文蓮

字雪心雪林女弟也

春景

聲聲啼鳥夕陽天拂面香風送管絃幾樹夭桃飛野火  
一溪嫩草吐寒烟紛紛粉蝶花間繞對對黃鸝柳外旋  
最愛芳菲深鎖處半灣流水正涓涓



秋柳

縷縷牽情傍渭河亭前寂寞唱離歌綠條別去芳陰少  
黃葉飄來瘦影多春怨年年愁裏斷秋思歲歲夢中過  
蕭蕭萬卉無窮思往事堪悲怎奈何

劉煥

字永和號蘭亭浙江山陰縣人適同里孫周若

懺堂

語鵲風鈴靜曲廊懺堂百級曳羅裳諸天自散曼陀雨  
密地潛燒解脫香疏尾簽名金字細案頭留供玉釵長  
刹那亦是龍華會敢使三生石易忘

憶外

別時鸞鏡破幽窻去後魚書隔大江身是瑤琴心是曲  
七絃彈盡不成雙

題亡姪女引姑遺照

珮玉珊珊海上仙香雲作縮正垂肩九原應滴思親淚  
回首親恩十二年

一去芳容恨莫追空留小影似吟詩可憐寂寂花前月  
移上疎簾照阿誰

趙嗣徽

詩見谷音傳響



次韻題明妃圖

宮圖滿幅麗人稠  
妾抱孤芳殿九秋  
絕徼沉冤無訴處  
愁來祇是撥雲頭

琵琶名

卓 璨

字文瑛浙江仁和縣人麟異孝廉之女歸海寧

陳補思明經著有俯滄樓集二卷詞滙十卷

懷故鄉詩

庭柯過雨暮生涼  
此際偏令憶故鄉  
繞閣雪花親屬賦  
滿樓明月妹聯牀  
水村歸棹烟波杳  
海國看雲白晝長  
自笑頻年荆布拙  
鳴機何日慰高堂

新秋坐月

清光斜照碧窻幽  
夜色堪憐最是秋  
侍婢尚牽金井水

玉盤涼浸小茶甌

海寧縣志卓璨字文瑛仁和唐樓里人祖彝官左庶子父麟異孝廉璨生而明慧好讀書年十八歸陳奕昌昌本廣東司李殿桂之子為伯之杰後方璨于歸時本生姑沈宜人慮其嬌怯且奕昌幼善病憐而育於所居之南宅未幾司李歿嶺表璨見沈宜人門戶獨支請歸所後尋奔父喪歸值沈宜人病劇手租冊授璨璨日向以爲人後不久累姑今姑垂歿而受本生產乎丁巳葬所後翁及前姑歸見四世數棺縱橫敗屋中泣語奕昌急葬之所著有俯滄樓集二卷詞滙行世子祺禎俱諸生其新秋坐月詩云云康熙三十

沈淑孫

八年學政張希良檄縣入志



侍御沈懋華女孫未笄卒

春閨

十四歲作

苔侵幽徑艸芊芊寂寞蘭閨晝捲簾燕蹴落花紅片片  
鶯揉垂柳綠粼粼春深小院遊蜂鬧日暖西窗繡線添  
閒倚畫樓凝望眼雲橫遠岫黛痕纖

方青

字阿青安徽桐城縣人方邠鶴先生之女也

陳珮玉贈方阿青詩一門應不慚諸謝風絮尤傳道韞佳却愧無緣親笑語捲簾人瘦比黃花

哭陳懷玉

千里移家托比鄰

去秋自都下僦居于揚州

吟箋書牘往來頻蘭言

未接香空殞永種人間未了因

經年同病感朝昏  
倏爾梨雲冷夢魂  
既痛早彫行自念  
滿簾紅雨注啼痕

汪燕淑

字雲浣性孝好讀書手不釋卷有所著述秘不示人父兄問之曰閨中字跡豈宜外人見耶年

十八卒

送二兄之閩

登車說壯遊有淚不敢流  
珍重臨岐語高堂已白頭  
及時謀吉壤行役寧辭遠  
只有慈母心車輪共輾轉



同懷亦多人兄獨嗟行路生女信可悲勞勞空乳哺  
鴻鴈暫分飛故巢生事微銜蘆須及早莫待寄當歸

李氏

號靜莊江蘇吳縣人適山西張九成著有素閨

雜詠深柳居詩

汪參素閨雜詠跋略三代而下文章之變隨時而遷識者於此或以理勝或以情深卓然矯起以振興之求之今日深晰此義者公卿大夫且或難之遑問閨閣之秀哉往余閱黃夫人集秀亭集雨花新咏朱靜菴集雖風情洒落亦感慨寄托處然終詞氣淺薄意謂妝窻彩筆不過爾爾歲已亥余客蒲陽署間得閱張九成先生尊聞李夫人詩風華掩映迥出尋常及子有庚子元旦之句五疊原韻愈刻愈新比今獲讀全稿高邁幽秀之氣溢于言外一篇雖竟而餘情盡

過分水坳次韻

壘固其功力有素亦由天分高曠故能吐辭命  
意卓犖不羣不禁服膺歎息曰是真能詞以理  
勝且亦自罪聞見之不廣矣易曰其德剛健而  
文明應乎天而時行是以元亨詩曰維號斯言  
有倫有脊夫人有焉捧讀至再手不忍  
釋爰書數語于卷末用志景仰之意

淑景散清溪晴波潤微雨詩人偶然過寓目此山水飛  
練掛碧峯雲氣隨龍尾泉脈中底分波光搖百卉松連  
亭影長落日明幾尺想見昆明池縹渺烟霞裏

王霸

儒仲修士節應辟亦蹇起陞謁不肯臣清名遍人耳侯  
公遜虛位遇毀輒復止藜藿歸自娛獨慚故人子軒車



既非慕縵袍亦何恥不有賢婦箴安能固終始

殘絲曲

東風無力春欲歸遊絲搖曳百尺飛  
哺雛燕子自來去嫩綠沉烟翻柳絮  
畫樓回憶芳時好愁鎖雙蛾慵不掃  
可憐只有夕陽天芳塵澹蕩長安道

病中偶作

忽病將危候昏迷昧古今半窗殘月冷  
一榻暗風侵愁聽思歸鳥還驚遊子吟  
羈魂何處著露氣滿楓林

燈花

不解開清晝休疑夜合花滋培膏澤滿  
爛漫映窻紗艷

質那相並霜姿未敢誇閨中常作瑞  
今古惜芳華

秋閨

清秋雨過簾生寒隔院蟬聲驚  
夢殘寶鴨篆消慵鼓瑟綠窻繡倦  
漫憑闌海棠解意臨風艷丹桂凝香  
待月看景物不殊鄉國異愁瞻鴈影  
度青巒

山中秋夕

一片秋光冷碧岑暮雲深處響疎砧  
歸巢野鶴初驚露隱樹寒蟬已罷吟  
風引澗聲過枕畔月移峯影壓窻陰  
幽人自領閒中趣忘却塵囂溽暑侵

子夜四時歌



懶上迴文機重簾閉秋影天際度哀鴻夢斷銀屏冷

蠟梅

淡黃衫子試新妝瘦骨銷來欲斷腸一點檀心傲冰雪  
笑他桃李逐春光

吳景桓

詩見谷音傳響

次韻題明妃圖

計拙和親漢室稠蛾眉斷送鴈關秋  
吳西子仍歸越妾命終拋塞外頭

章氏

浙江錢唐縣人適同邑陳幼學割肱療姑惜早

卒

絕句

良人行役計饕殮拭淚慈親暮倚門珍重鯉魚消息早  
白頭何忍負黃昏

錢唐縣志章氏錢唐張副將斐然之妹也歸于陳幼學事姑以孝聞姑徐病篤割肱以進年止十八而遽卒初章之卒也時幼學出遊且死索筆題詩以寄云云本省督周斗垣旌其廬曰剡肉全親

蘇世璋

字文圭福建漳浦縣人蘇軍門某之女海澄上  
公黃立齋夫人也著有瑞圃詩鈔



官獻瑤瑞圃詩鈔序昔我夫子刪詩大雅三頌  
 賢士大夫之所作也於小雅則閨中之詩兼存  
 焉於國風則又多矣而鵲巢采蘋采芣固南國  
 夫人被后妃之雅化長言咏嘆動於不自知者  
 弦而歌之凡射鄉飲酒皆奏之洋洋盈耳取其  
 感人心而歸於和平此自古而已然也夫人生  
 長名闕禮肅樂離歸嬪上公金擬玉應又躬逢  
 我國家內德之懋遠邁姜任關雎之化和以  
 鵲巢其一唱三嘆春容和雅如志氣之交動宮  
 商之相叶也美哉始基之矣夫子曰小子何莫  
 學夫詩又曰女為周南召南矣乎是夫人教公  
 子以詩之深意而余今日為表而出之將必有  
 采風之太史弦而歌焉復  
 譜而序焉無藉余言矣

林宗懋瑞圃詩鈔跋畧上公夫人乃前任提臺  
 蘇公女懋二十年司教安溪抵郡送考得謁  
 蘇公見其冲和嫺雅有羊叔子風度其家法可  
 比鍾郝故夫人徽音著美茲覽其集如風木吟  
 及勗子寄兄輓弟輓妾諸作具見其敦彝倫明  
 大義教孝教忠質之理學鴻儒語不過是也

### 富春渚

朝發富春渚清晨展遊眺定山雜雲霧逝湍見奔峭  
 蒼萬里帆緬邈區中紗碕岸紛參錯赤亭山照耀洊至  
 殷殷雷臨圻相唬噉周遭三十里翻浪聞叫嘯惟抱中  
 孚爻風濤詎能剽宵濟漁浦潭飛泉媚孤嶠芳林蹇落  
 英野曠沙垠渺中懷得昭曠外物何其小臨流發長吟  
 危柱音杳杳

### 擬陸士衡園葵

霖潦過庭除園葵自榮滋黃衣垂鮮澤元景揚清輝丹  
 心永不滓託質亦葳蕤凜凜天氣清落落卉木稀何如



長向日淡迤曬湘幃稱彼後彫質詎樂鬪芳菲

輓妾李氏

幻影真成夢飄零逐曉風感時傷永別留恨思無窮秋  
盡芙蓉冷春歸杜宇紅可憐貞淑質寂寞夜臺中

賦得霜催橘柚黃

南國生佳樹初寒醉曉霜綴林垂淺綠應節變新黃喜  
得金丸密還因素粉涼洞庭將急貢蓬殿欲先嘗遺子  
千頭緩怡親兩袖忙天公傳錫命冬令奉維揚

秋柳

用王漁洋  
先生韻

秋風落木暗銷魂颯颯霏霏下玉門憔悴不堪縈水畔

婆娑猶自繞烟痕獨憐繫馬思長道何處啼鳥入夜村  
一曲淒涼羌笛裏無情有緒總難論

蕭蕭疎影度寒霜半入斜陽半拂塘草裏茱萸堪作佩  
竹間雲母可爲箱眉銷灞岸思張敞腰瘦章臺恨楚王  
莫遣使君重問訊故園西角永豐坊

芳春作絮點宮衣秋色蕭條漢苑非陌上堤邊花事盡  
星移物換故人稀難憑眠力隨風起惟解飄枝逐鴈飛  
曾說金城千萬縷何堪流涕寸心違

深秋裊裊最堪憐一望平蕪雜暮烟枚叔不逢空旖旎  
小蠻欲別尙纏綿將軍舊壘傷今日帝子長堤憶昔年



爲想五株陶令宅西風搖曳夕陽邊

古檀詩話王文簡先生在濟南明湖賦秋柳四章  
閨秀亦多和作近有霞漳黃夫人蘇氏名世璋字  
又圭泉南提臺蘇公女海澄公黃立齋室也生長  
名閨雅擅詩才讀其和秋柳四首清新俊逸不減  
唐人著有瑞圃詩  
鈔皆琳琅可誦

勗子

禮樂詩書春復秋韶年駒隙信難留清泉未養童蒙德  
寒雪將侵慈母頭踵武有懷兄弟在傳經無愧行名優  
丁寧記取高堂語更要尊師禮義周

殘菊

素質真堪久枝殘尚發花最憐清影好和月碧窻斜

砧聲

寒衣擣盡月中聲終古銷魂少婦情最是離人聞不得  
西風莫送到邊城

陳鳳

詩見谷音傳響

次韻題明妃圖

塞外陰山冷氣稠明妃馬上獨悲秋琵琶彈出相思調  
一任黃沙吹滿頭

朱湘芷

字葯房浙江錢塘縣人



題許氏連枝圖

雙松多秀色忽減歲寒姿夜雨思連理春風怨折枝分  
荆情易感接樹術難知無限鴿原恨空吟一卷詩

秦 沅

字湘南號蓬萊山人安徽縣人

美人風箏

步台臬使原韻

青雲有路許飛騰如在瓊樓第幾層弱不勝衣裁白紵  
嬌難顧影倩紅燈等閒天上來青鳥容易人間繫赤繩  
三月相將留別恨來年可許望先登  
十二瓊樓望不分瑤姬何事舞羅裙可能飛去依明月

未必行來是楚雲環珮有聲猶弄影嬌羞無語亦趨羣

天涯別有相思調譜入春風次第聞

吳受竹

浙江長興縣人善畫適同邑 著有萬卷

樓詩鈔

鄧汝功萬卷樓詩序我師母吳夫人延陵貴胄  
茗水女宗族望通華門楣清綺椒花賦就幼齡  
已才匹大家香茗吟成早歲更名趨三妹歸我  
夫子俊及聲高斗山望重眉齊青案聯室內之  
芝蘭書校牙籤實仙家之眷屬訂訛質誤互為  
一字之師刻燭分題競睹八義之韻迨夫一行  
釋褐盡室之官那矜翟茀之榮不改詩書之素  
頌福曜者兼欽德曜瞻文星者並仰媮星勉勉  
勤勤離離肅肅清吟滿篋寧徒評月色于天邊  
雅製盈編何忝擅風期于林下洵文壇之職志



亦藝苑之琳琅所謂伉儷同心身名俱泰者矣

沈夫人園中卽景

翠岫舒眉報曉晴  
蘭闈裝罷出春城  
藏身楊柳鶯喉滑  
掠影桃花蝶翅輕  
蘇蕙題詩吟欲徧  
衛娘法帖寫初成  
老人久矣耽枯寂  
扶杖相隨也有情

簾

一片輕雲下碧空  
清湘搖曳畫欄東  
珮聲遠識從容步  
燭影何愁料峭風  
燕子乍歸春暝月  
光初射玉璫瓏  
幾回欲擬閑情賦  
但願長依繡戶中

歲杪雜詠

苦雨酸風逼歲除  
枵鎗隨分儘蕭疎  
飛揚意氣曾何用  
一局殘棋百本書

水僊花

來若珊珊望又遲  
黃冠翠帔道裝時  
如他世外妻梅客  
配爾明湖水畔祠  
洛浦曾聞步有塵  
藐姑未許雪爲神  
消魂絕代娉婷影  
暮雨蕭蕭水國春

金宣哲

字太霞安徽休寧縣人崇仁令金渭之女也適浙江遂安縣毛紹蘭著有梅軒詩鈔



金楹梅軒詩鈔序畧姊氏梅軒幼從父受經書  
 姊婿遂安毛君佩芳與予共筆研姊氏往往發  
 凡起例詰難不止生平雜誦王右丞詩韓昌黎  
 文又深味乎易之繫詞周禮之考工記宜其氣  
 茂春松潤流秋露有以自見也予嘗語毛君  
 閨中得此良友別具賞心况吾姊氏古律諸調  
 體近自然絕異邯鄲之步使其造詣  
 由此日精列之古名媛中何多讓焉  
 吳蔚光梅軒詩鈔後序畧蔚光八歲時姊隨父  
 母入都見姊山塘舟次十四歲姊父母之吉水  
 任偕姊與姊婿毛紹蘭過蔚光家復見姊二十  
 有二年矣不知姊能為詩也是年春佩芳北來  
 手一編示予名章秀句絕去瑀飾中間詠物感  
 懷諸作辭興婉愜情喻淵深而讀易示子則宛  
 然女學士語較昔班固之妹韋逞之母當不過  
 爾又與佩芳力勤守約以其暇唱酬一室詩曰  
 琴瑟在御莫不靜好此之謂矣聞姊詩尚多他  
 日或得駕扁舟沂富春江過嚴陵灘登佩芳之  
 堂見姊悉讀姊詩  
 更當為姊序之

思親

弱齡處深閨父母最有恩命我近筆墨經義為講論占  
 易識大象習禮明周官詩列右丞席文窺昌黎藩女紅  
 既弗責所得惟古歡及笄上京華迨吉煩嫁婚定省亦  
 未缺別離尚無言自從江右廻常隨侍吉水鄱陽兩縣署中人事多  
 變遷念父髮漸白感母心不寬時仲弟抱病而余亦以病弱煩母慮好風  
 西北來百里雲漫漫親舍在其下舉首不得攀生身為  
 女子骨肉何能完非無孝養理難作家庭看伸箋寫綢  
 繆欲泣聲復吞

紫宮謠



摘芳集 卷二十四  
莫綠當熊檻花明望鵠臺六時聞換樂三日賜浮盃  
品神仙致衣香外國來君王多暇豫重宴柏梁迴

病起

病起渾無力終朝倚繡牀親慈增食品弟慧改醫方  
雨洗梨雲淡風搖竹露涼齋心師導引駐景合教長

詠孩子

繡襖提戈歲鳩車戲竹時乳香猶自蘊茶具漸能持  
健邁三朝虎妍凝一體脂指盤呼日月畫壁象龍螭  
愛剔花階石欣扳果樹枝倩童書鬼字教婢唱歌辭  
縛犬求長線尋猫壞短籬葦弓爭射鳥蒲劍共誅蚊  
紅葉聯裙繫蒼鳴代鶴騎候風拋片羽映水捉游絲  
奩粉偷丸藥牕紗悄裂旗客來時占座筵上每翻匙  
揖拜雖隨命衣巾却怕媮無勞徵世德且任逐羣嬉  
漫道驕緣寵堪憐點近癡題詩聊示誠天趣少鬚眉

曉月

東華霞鬱幾千重朱火宮前宿靄濃自帶珠輝沉合浦  
空飄桂子在靈峰雞聲已叫人間露鶴夢纔驚世外鐘  
一曲紫雲聽唱去瑤蟾何處逐仙蹤

蠶詞和外

二月桑條綠映溪溪邊浴種已生齊誰家短短鴉鬟女



不挽筠籠坐短梯

青絲爲絡桂爲鉤姊妹相攜南陌頭任他花鳥撩人甚

那有心情學冶遊

但願吳蠶八蠶新一年三熟濟清貧蠶娘個個穿羅綺

方見春風被德勻

林氏

福建人

賀黃莘田重赴鹿鳴

丹桂花開六十秋振衣人到廣寒遊嫦娥細認曾相識

前度人來竟白頭

隨園詩話余在杭州杭人知作詩話爭以詩來求摘句者無慮百首余只愛朱亦錢春晚書懷云春當三月原如客人過中年欲近僧沈菊人一聯云雙雀露濃移別樹孤螢風靜引歸人福建女子林氏賀黃莘田重赴鹿鳴云云

顧若憲

江蘇吳縣人張笠亭明府之淑配也以子貴

誥封恭人著有挹翠閣集惜未之見

得黔中信二首

黔中驛使到腸斷血沾襟絕域懷歸意頻年憶女心不

會虛藥物猶爲寄華簪悽絕離亭語迢遙遂至今

官舍千山外飄飄丹旆懸望雲空白髮繞膝待黃泉猶



有清吟在應教彤管傳阿兄歸日近負土在明年

喜弟至

千里迢迢客乍回相逢歲盡笑看開廿年髮逐梅花白  
一夜春隨爆竹來誰料異鄉逢雁序細談舊事劃鑪灰

殷勤傳語司更者漏箭城頭莫浪催

隨園詩話仁和沈椒園庭芳查聲山學士外孫也  
其尊甫麟洲先生宰文昌被累戍寧夏母查太淑  
人留居嘉善不從行椒園每歲南北省親極行路  
之苦有詩云秋生紅豆辭南國春到青銅赴朔方  
青銅者寧夏山名又雲影有心隨望眼淚痕和綫  
綻征衣為厲焚謝孝廉所賞沈歿後張少儀有詩  
哭之云塞上草枯雙淚白瀛州雲淨一襟清草枯  
用裴子野事蓋紀實也觀察尊甫笠亭先生宰印  
江與沈全成觀察徒既萬里號呼求救卒獲安全  
嗚呼三君皆與余同舉詞科而沈張兩觀察又同

舉詩社于李玉洲先生家往來尤狎今皆先後化  
去追思六十年中升沉聚散音塵若夢可為於邑  
張母顧恭人若憲即畢太夫人母也有挹翠閣集  
與武林林以寧顧妣齊名隨宦牂柯卒于官所太  
夫人有得黔中信二首最悽惻詩云云其後尚書  
迎養秦關少儀自滇中解組來署白頭兄妹唱和  
終朝太夫人  
又作云云



擷芳集卷之二十五目錄

才媛詩

古歙初菴汪啟淑選

蘇碧虬 一首

翁 桓 四首

龔靜照 六首

胡 瑗 三首

錢宛鸞 四首

錢宛蘭 一首

黃 蕙 一首

張在貞 二首

梁 琬 二首

吳玉音 一首

彭 淑 二首

張靜御 一首

陳 氏 三首

吳淑賢 二首

方 氏 一首

顧長任 二首

賀 潔 句

劉若蕙 一首

方 靜 六首

柏盟鷗 六首

虞 氏 二首

孫旭瑛 三首

張 貞 一首

李雙虹 二首



李彩虹 四首

陳氏 三首

黃克巽 十六首

王琰 一首

徐惠文 四首

席氏 句

徐裕馨 五首

擷芳集卷之二十五

古歛 訥菴 汪啟淑 選

蘇碧虬

江蘇蘇州人

題竹

閒拔金釵撥翠筠  
尋春人自惜殘春  
幽情無限誰能見  
疎雨東風總未真

觚賸湖州白雀寺築竹盈園枝修節巨有女子刻詩於上云云後書吳門蘇氏碧虬題

翁桓

字少君浙江錢塘縣人憲副翁汝遇女胡彥遠



之室也

錢塘縣志胡介字彥遠幼穎異爲博士弟子性高介抗意而行後隱於河渚蓬門蘿屋與其妻翁氏笑傲溪山間翁故武林巨族能詩有賢名夫婦倡和欣欣自得死後十年淮東黃之翰爲刻以行世

與眉媛泛渚懷旅堂夫子

殘日下林木輕舟泛渚中蘆看兩岸白楓憶萬山紅澹澹秋光迥泠泠曲港通蒼涼石橋畔似與去年同

已丑冬同郎山眉士兩夫人泊舟三橋卽席分韻得西字

十年重到六橋西衰草風高塞馬嘶畫閣欲隨歌舞散

荒祠已共雨雲迷舟中香細琴聲緩水上人歸日影低返櫂西陵黃葉下燒燈簡取舊時題

夫子客舊京却寄

楊花飛繞曲廊西薊北征人隔鼓鼙一樹海棠顛顛盡風風雨雨鳥空啼

重過西湖

兩高峯翠撲眉低草綠山腰水滿隄畫閣已傾歌舞散不堪懷往思淒淒

龔靜照

字冰輪號鵑紅江蘇無錫縣人進士龔廷詳之



女也適同邑陳生著有永愁人集

詩觀鵲紅產名閨工詩畫而抱天壤王郎之怨故詩多悽斷尤以尊君中翰懷沙之恨每寓詩歌遭時輒軻無若鵲紅者

題二分明月女子集

雲出巫峯水分滄海姑射呈姿洛妃含態味不施丹碧  
非緣黛鬢影風前眉痕天外裊裊玉釵蕭蕭羅帶笑隱  
三生眸明一睽花號解愁香名宜愛似皓影兮鮮華望  
碧雲兮鬢黷瑶華燦兮千里霓裳紛兮兩隊問遺響於  
玉簫或伊人其宛在

檀香筆格

雕琢人工巧旃檀具質深名應傾北海價可溢南金敢  
負香中意承輸格外心慨將神物贈不與世浮沉

落花和韻

已覺煙消暮雨殘洛陽三月倩誰看紅香暖日流雲散  
青冢黃昏泣露寒競逐鈿釵春未減暗窺粧鏡淚初乾  
匆匆何似休歸去回首連天紅雨漫

贈周寶鐙

葯房新詠氣如芬柳絮名高自不羣握管獨吟詩博士  
畫眉爭識女參軍嬌藏金屋音猶遠步出香塵意轉殷  
祇為天涯消息杳幾番愁摺石榴裙



七夕大雨夢先生限筠茵韻

天也憐人負此辰  
雨沈河影浸雲茵  
雙星兩地分南北  
烏鵲填橋恐未真

匝歲離多淚已盈  
化為甘雨溢花茵  
縱生天上猶天忌  
始信人間事有因

胡瑗

字晚如山東海陽縣人適鄭於雅

和送別原韻

一別情無限愁心寄晚風  
羨君佳句好白雪和難工

紅梅二首

幾回錯認杏花村  
染得猩紅淺復深  
不道幽香盈小院  
林家當日是知音

玉骨冰肌染嫩紅  
依依低映粉牆東  
莫教狼藉春泥裏  
常伴妝臺鬪曉風

錢宛鸞

字翔青江蘇吳縣人也適文學貝生

翠樓集錢宛鸞字翔青吳縣人美姿容工翰墨  
風流儒雅擅絕三吳今讀其詩如魂迷蝶枕三  
更夢腸斷花箋一紙詩又翠屏斜倚思無  
奈夢捉飛花過小橋豈非自為寫照耶  
圖繪寶鑑錢宛鸞字翔青蘇州人工詩善畫

秋霽



一雨新秋候千林暑氣收歸雲依落照飛葉滿荒邱樹  
杪蟬聲咽天空雁影浮良宵清不寐秉燭上南樓

無題

天涯後會豈無期鸞鏡生憎妬影時別緒遠依雲樹杳  
音書難訊雁魚疑魂迷蝶枕三更夢腸斷花箋一紙詩  
憶得秦樓雙跨鳳洞簫聲咽不堪吹

芙蓉

吹來玉露濕花光側岸芙蓉獨傲霜綠葉不隨楓葉赤  
紅英相伴菊英黃蜀城日照開新錦江渚風牽醉晚妝  
祇許伊人得持贈淡烟疎雨自生香

春恨

風雨閒庭鎖寂寥又看春色望中消翠屏斜倚思無奈  
夢逐飛花過小橋

錢宛蘭

字卉玉宛鸞胞妹也工詩畫善音律

題羅巾

宮門未入獨愁予可嘆良緣尙子虛堤上風光春又過  
全憑雙鯉一封書

黃蕙

圖繪寶鑑宛蘭字卉玉蘇州人宛鸞胞妹適翰林  
吳公宏安能詩工畫蘭善音律其題羅巾詩云云



浙江錢塘縣人適洪某

姚母五十節壽詩

家法金陵後伊誰擅母儀夫人垂令範吾黨奉明師憶  
昔調琴瑟頻年效倡隨俄驚雲聚散忽愴月盈虧寶鏡  
鸞孤舞霜天雁獨悲形將石並化城爲淚俱墮但惜雛  
方弱寧甘藥似飴不隨波汎逐時任道推移往往親機  
杼時時奉盥匱玉筐寒兔滿金鼎露華滋草聖教兒習  
鍼神視女爲懷蓮心獨苦泮柳力先疲廬舍今如此痛  
瘡詎可期自非勤式穀何以藉攸宜雅譽文塲溢賢聲  
彤管推黃花紛爛漫碧草秀歲蕤庭下江波湧堂前綵

服追我儀璇閣裏清影照瑤卮

張在貞

字蕙琬江蘇太倉州人翰林張溥之女著有月  
窗詩稿

美人圖

綠徑朱闌薜荔牆松風常伴美人粧清秋月轉梧桐影  
一曲新聲引鳳凰

憶姊

銀河迢遞暗螢過數點疎星別思多遙憶獨帷人未寐  
漏聲應促月明歌



梁 琬

字玉姬詩見過日集

搗衣行

長安秋聲風瑟瑟千家萬家搗衣急年年寄去不寄回  
君不見北邙白骨何纍纍

訪春

花信幾回遲鶯聲已占枝金鼓公子勒酒壓美人卮簾  
外桃花鬢牆頭竹葉詩愁心催更久春夢不多時

吳玉音

浙江錢塘縣人

踏青

蘇公隄畔畫橈停踏去香風百草青自對春山看花鳥  
六橋絲管幾曾聽

彭 淑

字又徐號少君江蘇華亭縣人孝廉彭又燕之  
女弟適沈友聖

和友聖送別友人韻

唱別陽關正夕曛一行哀雁訴離羣高朋分手如虧月  
遊子閒情似片雲社裏忍違陶處士座中曾指孟參軍  
掛帆風色吳江冷尊酒何時再論文



寄外

闌干徒倚夕陽天  
愁向銀釭照我眠  
此夜斷腸君不見  
秋風吹落月嬋娟

張靜御

字里未詳詩見過日集

贈某氏女子

天上仙人玉顏膩  
一雙眉目新峯翠  
沉檀香暖鬟墮雲  
半頰微紅餘小醉  
少婦琵琶壁外彈  
聲高驚起荷花睡  
此時秋沼動波光  
正是瞳人欲到地  
口中宮徵師曠調  
鳳凰鸞鷲不能驕  
夷光一輩都羞殺  
誰是春深鎖二喬

陳氏

浙江餘姚縣人適順治丁酉副榜鄒侯周夫婦  
倡和相敬如賓詩見續姚江逸詩

冬曉

一夜朔風嚴萬山淨如洗  
邨遠不見人微微淡烟起

高樹

窗外多高樹扶疎天與隣  
綠陰受細雨一雨一番新

春暮偶占

幾番好雨幾番風舉目庭前新綠濃  
沉水焚爐惟獨坐香烟不散繞窗中



吳淑賢

江蘇長洲縣東山人詩見百城烟水

香花甲和韻二首

寺前奇卉號香花曾薦仙家與佛家自媿深閨知識晚  
也將黛筆學塗鴉

色翠香幽自出羣非蘭非芷獨氤氲不因好事親求得  
冷落空山伴白雲

方氏

安徽桐城縣人戶部方大鉉之女也

朔風

朔風何太急澗戶偃秋蘭涼氣生隅坐愁人多苦寒砧  
聲村外亂鳥語露中殘倒影入林木孤雲虛室看

顧長任

字重楣號霞仙浙江仁和縣人青浦少尹顧籥  
雲之女適林以畏著有謝庭香詠梁案珠吟

圖繪寶鑑顧長任字重楣別號霞笈仙姝仁和  
人茂才林以畏室幼時穎慧觀讀書史一過便  
了了女紅之暇涉音律工染翰弈棊蓋其滄江  
公以來祖孫皆以詩學名世故長任得以繼武  
也著有謝庭香  
詠梁案珠吟

題美人圖次王姑黃太夫人韻戲用鳥名

翡翠牀陳紅錦褥捲幃嬌墮鸞釵玉斜背春風怯畫眉



弱影紅紅搖鳳燭時添沉水裊金鳧夜深怕聽烏棲曲  
夢殘鴛鴦枕屏空夢醒鶯花為誰綠

冬夜大風此年十二時應聲作也

小閣月初斜西風透碧紗枝頭應有信春意在梅花

賀潔

字靚君江蘇溧陽縣人適同邑史左臣著有愁

人集

句

曉眠聞燕語

細雨燈前句斜陽花下卮卽事

掠蕊蜂鬚膩穿花蝶翅香曉霽

紅豆調鸚鵡青綾繡鳳凰贈隣媛

團扇乍拈題欲遍湘簾將捲倦還休初夏

遶徑寒蟲吟落葉帖天征雁襯殘霞秋晚

金鈎斜掛鴛鴦帶鈿合閒收翡翠冠病中偶感

溧陽縣志賀靚君名潔六七歲時能屬文一夕納涼父曰夜坐看螢飛靚君卽應曰曉眠聞燕語及笄歸庠生史事理家之暇唯好吟咏著愁人集其卽事曉霽贈隣媛初夏秋晚病中偶感警句如此孰謂溧陽無才媛者乎

劉若蕙

山東諸城縣人適諸生許瑤著有捧翠集



秋夜寄外 時客燕都

一片長安月清光  
兩地盈懸知千里  
客不盡故鄉情  
窻竹寫秋影  
村砧搗夜聲  
空閨愁不寐  
自語對燈檠

方靜

字晚香安徽桐城縣人明經方公默之女也適

廬江許正齋著有友蘭閣饋餘集

初春病起感懷

翠被輕寒睡起遲  
春風無計可支持  
雙眉懶畫因新病  
一卷拋殘是舊詩  
雪霽庭梅初破凍  
日長堤柳漸抽絲  
年來鄉思憑誰訴  
獨有粧臺明鏡知

憶舊東諸姊妹三首

少小隨肩長各方  
兒時勝事尙難忘  
碧紗窗擁書千卷  
沉水煙籠被一床  
春到樓頭人共繡  
詩聯花底句生香  
閒來笑語雙親側  
誰解桃夭惹恨長

却嫌井臼誤填箎  
盼得寧家慰所思  
聚首渾忘男女累  
歡談盡是別離辭  
花憐客到香偏遠  
月愛人歸影故遲  
竹屋松窻姜被暖  
絕勝昧旦問雞時

和光未久忽秋陰  
霜雪無端折大椿  
鴻陣驚風悲失序  
燕泥經雨泣殘春  
卽逢好會人俱老  
縱使重歸跡已陳  
白首不堪懷往事  
詩成一字一酸辛



寫便面花鳥祝節孝三姊宋夫人

碧玉桃開二月天盤根錯節自年年枝頭好鳥青鸞種

應與瑤池一樣傳

何分幽翠與芳紅都在春風雨露中階下紫芽開正好

籠人香氣繞簾櫳

清詩備采友蘭方太君吾友許君容菴之令慈也為桐邑理學司徒公之裔司農公孫女明經公默先生女同懷姊妹有四大君居幼皆負詩名博通今古太君兼工丹青蓋夙慧有根也前選詩針特因寄遲刊竣止附載數首茲選特補錄若干首惜諸姊未得登珠玉

柏盟鷗

字映潭江蘇揚州人善丹青工絲竹著有柏潭

詩鈔

韓矩柏潭詩鈔序略廣陵閨秀柏盟鷗字映潭者乃余友沈中垣之甥中垣因道其所自且出其稿以屬余謂吾甥女有奇氣於技藝無所不嫻而尤工於絃索點染丹青為山水可以亂董北苑之真至漁獵家所藏書自四子五經而外以及古史綱鑑左國秦漢諸子史之類一一皆洞悉其旨旁及騷雅辭賦無不窮微詣粹日漸月積有詩成帙頗深自韜晦不肯輕示人余展讀一遍香泛齒頰音節一以唐為宗而取材於漢魏焉我聖朝倘開女學士之科不知其較上官昭容何如也嘗閱列朝詩入選者三十二人至本朝號為女宗者國初亦見有數家近則武塘及夫人與松陵之吳夫人可傳余往來海內十數年十五國足之所至欲遍求奇人異士得閨秀詩數十家再於數十家中求其詩之有合於格局聲調者十家謀錢其版以行世



秋夜

畫眉收鏡晚窗下理吟箋水漾星搖幕雲圍月暈天絮  
蟲吟夜露老鶴夢秋烟樽酒誰家院鳴鳴奏管絃

遊法海寺

淡烟疎柳外信步到招提竹院閒眠鶴蕉陰靜聽棋破  
雲飛紫燕坐樹語黃鸝鐘鼓經壇響千山夕照移

春日和刘夫人韻

夢回窻下理縑緗簾捲輝輝曉日光燕子輕風芳徑煖  
杏花疏雨畫樓香鶯雷野蕨迎階秀解籜新篁拂檻長  
一樹春鶯啼不斷粘衣蝶粉膩如霜

題畫

樹擁津亭小雲迷古寺深扁舟溪上客獨立釣湖心

遣興

雪翻石竈煮新茶楊柳風微紫燕斜蝶夢已回香氣煖  
小窻秋水讀南華

小畫遣興

石榴花片落書床蝶掠風絲過短牆簾滑龍鬚初睡足  
自調丹碧寫烟霜

虞氏

浙江浦江縣人虞邦理女適東陽縣李俊培



始見

強意飾閨粧今朝乍見郎含羞無一語却立鏡臺傍

惜別

淹淹奉酒卮心緒亂如絲不道別離苦還思相見時

孫旭媿

字曉霞安徽歙縣人

初夏感懷

漫將針線療奇窮九十韶光瞬息中事遇傷心人易瘦  
詩摹變體句難工生憎柳絮因風起不忿桐花爲雨空  
過眼繁華皆石火莫將榮落怨天公

偶作

蓬窗趺坐每移時靜裏真如若遇之未盡五車羞作賦  
已參三乘懶哦詩愁長那計春歸早夢短偏嫌月到遲  
針線強拈非諱疾恐教垂白兩親知

壽陳母

飯熟胡麻酒菊香羣仙遙集捧霞觴飄飄鶴髮垂雙鬢  
擬是瑤池降大荒

張貞

山西太原縣人華士敬室也

遠遊曲



遠遊那可了坐惜紅顏老花開隔岸林目斷江南草

李雙虹

詩見孫貞女殉烈詩集

挽孫貞女

蘭摧玉折惜奇葩椽筆空慚起怨嗟遙想當時粧閣樣  
名香淡粉寫梨花

義烈真成閨閣師花飛玉碎不勝思人生夢幻須臾事  
惟有芳名千古垂

李彩虹

雙虹之妹

挽孫貞女

矢志相從豈惜身堅貞端合並松筠古來名媛知多少  
義烈如君得幾人

一縷紅絲誓不移鍾情何必定情時芳魂疑化翩翩蝶  
來去雙飛連理枝

釵分鏡破兩無緣結伴吹簫入九泉誰向墓門琴獨撫  
朝飛一曲付哀絃

巾幗風裁迥不同山川間氣萃吳中聊拈彤管傳高節  
下里巴吟愧未工

陳氏



字里未詳陝西驛道程霽巖兆麟配也

挽張幔亭

清河季子蚤稱賢天賦才華美綺年丹桂未攀成鶴夢  
空留斷墨與殘篇

一着青衫數便終椿萱腸斷泣西風漫嗟世上儒冠誤  
文命相爭自古同

采得芹香慰老親森森玉樹謝庭春忽驚風雨傷摧折  
繞膝承歡少一人

黃克巽

安徽歙縣人適鄭某以產難卒著有繡餘偶草

江南通志黃克巽歙人曰瑚女幼聰慧喜為詩  
一字未安卽竟日忘食歸鄭未幾卒年二十著  
有繡餘集

楊以牧繡餘偶草序略潭渡黃氏夫人諱克巽  
之所作也夫人為宗夏先生愛女幼而聰慧絕  
世於書無所不覽尤喜為詩刺繡之暇時時拈  
弄筆墨或推敲未穩卽竟日忘食歸寧周鄭君  
不幸以產難死年僅二十耳出其遺稿若干首  
示余命為之序竊惟古來女子能詩者首推后  
妃他若莊姜共姜許穆公夫人之屬皆得見錄  
於聖人下自漢魏六朝唐宋元明淑姬才媛何  
代無之或者以為閨閣之作多怨詞焉今讀夫  
人諸詩格高而雋句煉而新非能言之士所能  
及非直一洗脂粉之陋而已因是而思國家  
治運休明山川靈淑之氣扶輿鬱積兼鍾女婦  
而詩教之盛於古為烈且亦以見先生家學之  
美傳於其女者猶若此也語云豐此嗇彼天縱  
之有才而奪之壽者傳聞紀載更僕難數夫以  
一女子揚風扞雅直足上繼柏舟燕燕諸詩垂



令名於不朽以視庸夫愚婦雖年至百歲奚  
貴耶先生亦以余言爲然遂書之以爲序

### 棄兒行

棄兒不得賣兒金賣兒不識棄兒心賣兒母得三日飽  
棄兒但望兒得生去年憐兒不忍賣今年欲賣路無人  
枯樹無皮草根盡兒啼無食母亦哭昨夜良人死空屋  
阿翁今日填深谷先死猶得餽飢烏遲死隣家賣子肉  
棄兒與君君勿辭但得兒生死亦足壽哉遭此凶年苦  
皇天殺人不用斧吁嗟乎當年得兒如黃金今朝棄兒  
如糞土

### 禽言

提葫蘆提葫蘆無錢莫向東家沽阮生痛哭山之阿提  
葫蘆淚如梭

公公掛鈎下灘布網上灘截流海母泣兮蛟奴愁公公  
掛鈎網晒船頭魚鰕絕影旁及泥鰍大者沽酒小者換  
油族類盡網罟休一聲欵乃江上秋公公掛鈎

### 竹簾

舒卷由人力飄飄老此生堂深香欲燼風靜碧無聲薄  
質破難合柔絲縮易成回看湘水上直節自瑤瑤

### 野花

野花雖小草亦復鬪青陽儘有傾城色殊多繞坐香露



珠凝曉泪蝶粉拭新妝容易春光老芳菲亦太忙

登虎邱

平川如掌綠侵扉疊閣層樓護翠微不放山光隨樹出  
却教水色入窻飛雁橫浦上秋雲薄帆轉林梢白浪肥  
游罷莫尋妃子蹟闔閭塚上草萋菲

瓶中白荷花

紗窗靜掩寂無譁獨對亭亭出水花翠蓋尙疑擎曉露  
碧筒真擬貯流霞已辭脂粉超凡俗更脫汗泥絕點瑕  
回憶橫塘最深處暗香十里晚風斜

絕句

鳥啼春色曙鷗曳水生痕煙草迷沙逕風花落小軒

祝比丘尼御符四十初度

鉄壁銅牆四十年跣趺終夕息諸緣自從出得文殊定  
水在滄江月在天

竿頭百尺轉身輕水盡山窮路又更一塢白雲聽有色  
千江明月看無聲

一會龍華尙儼然春風彈指已千年末山可肯容靈照  
親證龐家兒女禪

卽假卽真研止觀非心非佛熟黃梅數完黑豆無消息  
得得親承半勺來



不二門中金色女今朝合十禮真如偶然摸着娘生鼻  
驚地撩拳搨大愚

只今冷火蕪寒灰拔楔當機切莫推塗毒鼓槌無面目  
略容擬議一聲雷

分明一大事因緣菊綻東籬豈偶然不敢攢眉便歸去  
從容正好印三玄

選佛場中舊學人今朝公案又重新直須燒却閒文字  
撒手懸崖始見真

黃介哭姪女克巽詩淑女原無忝才華更出塵堪  
稱謝道韞未遜衛夫人鴻業時相敬椿庭孝轉頻  
云何天不佑倏爾喪青春女生雖外向孝行覺無  
慚雖賦桃夭詠仍來戲彩感草傷亡益母花自任

宜男何事離親  
逝令人淚不堪

王琰

字炳文江蘇長洲縣人副榜蘇敏淑配

題片石孤松

凌寒松不改終古石難搖若識臨毫意清風撲面飄

圖繪寶鑑王琰字炳文蘇州人副榜蘇敏之室也  
容色艷麗性格溫柔才而且賢能詩善畫其題片  
石孤松  
詩云云

徐惠文

字素存安徽桐城縣人適同邑孫循徽

歸魯拱山房



離別竟三月思歸幸得歸老親行策杖弱女淚沾衣萬  
木深秋瘦千峯晚日微白雲詩在手終日共忘機

春夜

片月紗窓滿春風自揜扉燈光焰不定爐火暖相依更  
靜鳥聲怪山空樹影稀老親棲止處夜夜賞清輝

洪山漫興

十畝陰藏一逕斜眠牛山下雨如麻夕陽芳逕延孤座  
斷崦寒雲罨幾家儘有鳥啼將落月杳無人問未開  
茶柯麥穗分叢綠最愛芄芄帶曉霞

夜

露濕花梢重窻明新月生鳥棲山語靜流水和松聲

席氏

江蘇常熟縣人適王次岳

句

菖蒲斟玉斝獨泛已三年

隨園詩話虞山王次岳妻席氏能詩端陽日寄次岳詩云云亡何天亡次岳哭云蛾眉月易沉天際鳥瓜仙難住世間舊雨每來先治饌殘燈欲施尚論詩幾夕殯宮移榻畔還如同病對牀眠

徐裕馨

字蘭蘊浙江錢唐縣人相國文穆公女孫也

卽景



讀罷黃庭卷，嬾開靜中消息。費推裁，吹燈欲禁花留影。剛捲珠簾，月又來。

暮秋

寒蝶低飛，月滿枝海棠紅。冷桂凋時，笑儂竟比黃花瘦。青女多情，知未知。

畫眉

柳梢枝上曉風柔，夢醒雕欄語未休。莫向碧紗窗畔喚美人，猶是未梳頭。

暮春

殘紅片片卸簷前，樹有餘香蝶上憐。士來不來芳草外

鞦韆猶繫綠楊邊，中庭風靜遊絲落繡戶。簾垂紫燕穿，恰好送春詩未就。瑤臺有妹贈雲箋。


夜雨

夜雨小窗多少春，喚子規去了起來收拾餘花。又把五

更風惱

隨園詩話：閨秀吾浙為盛，庚戌春掃墓杭州，女弟子孫碧梧邀女士十三人大會于湖樓，各以詩畫為贄，余設二席以待之。徐裕馨相國文穆公之孫女也。畫法南田，詩吟中晚，即景云云。又暮秋云：畫眉云：暮春云：夜雨云云。





Handwritten text in vertical columns, likely bleed-through from the reverse side of the page. The characters are small and difficult to read due to fading and the watermark.



